



www.qbz.gov.al

FLETORJA ZYRTARE E REPUBLIKËS SË SHQIPËRISË

Botim i Qendrës së Botimeve Zyrtare

Viti: 2020 – Numri: 138

Tiranë – E hënë, 27 korrik 2020

PËRMBAJTJA

	Faqe
Ligj nr. 85/2020 datë 2.7.2020	Për disa ndryshime dhe shtesa në ligjin nr. 10 192, datë 3.12.2009, “Për parandalimin dhe goditjen e krimit të organizuar, trafikimit, korrupsionit dhe krimeve të tjera nëpërmjet masave parandaluese kundër pasurisë”, të ndryshuar.....
Dekret i Presidentit nr. 11559, datë 22.7.2020	Për shpallje ligji.....
Vendim i Entit Rregullator të Energjisë nr. 106, datë 2.7.2020	Mbi miratimin e rregullave të tregut shqiptar të balancimit të energjisë elektrike.....
Vendim i Entit Rregullator të Energjisë nr. 107, datë 2.7.2020	Mbi kërkesën e shoqërisë “MTC Energy” sh.p.k., për transferimin e aseteve të saj të barrësuara nga “Raiffeisen Bank” sh.a. tek “Alpha Bank” sh.a.....
Vendim i Entit Rregullator të Energjisë nr. 108, datë 2.7.2020	Mbi një ndryshim në vendimin e Bordit të ERE-s nr. 187, datë 10.11.2017, “Për licencimin e shoqërisë “Albgaz” sh.a., në aktivitetin e shpërndarjes së gazit natyror”, të ndryshuar, dhe një ndryshim në vendimin e Bordit të ERE-s nr. 188, datë 10.11.2017, “Për licencimin e shoqërisë “Albgaz” sh.a., në aktivitetin e transmetimit të gazit natyror”, të ndryshuar.....
Vendim i Entit Rregullator të Energjisë nr. 109, datë 2.7.2020	Mbi disa ndryshime në vendimin e Bordit të ERE-s nr. 221, datë 20.12.2019, “Mbi disa ndryshime në vendimin e Bordit të ERE-s nr. 179, datë 8.11.2017, ‘Mbi certifikimin e shoqërisë ‘Operatori i kombinuar i gazit natyror ‘Albgaz’ sh.a.’”, të ndryshuar.....
Vendim i Entit Rregullator të Energjisë nr. 110, datë 2.7.2020	Mbi kërkesën e shoqërisë “Solaris Power” sh.p.k., për rishikimin e vendimit të Bordit të ERE-s nr. 86, datë 12.5.2020, “Mbi refuzimin e kërkesës së shoqërisë ‘Solaris Power’ sh.p.k., për licencim në veprimtarinë e tregtimit të energjisë elektrike”.....

Vendim i Entit Rregullator të Energjisë nr. 111, datë 2.7.2020	Mbi plotësimin e kushtit të vendimit nr. 80, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k. nr. 291, seria FK15, në veprimtarinë e furnizimit të energjisë elektrike, të miratuar me vendimin e Bordit të Komisionerëve të ERE-s nr. 73, datë 13.5.2015” dhe vendimit nr. 81, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k. nr. 290, seria T15, në veprimtarinë e tregtimit të energjisë elektrike, të miratuar me vendimin e Bordit të Komisionerëve të ERE-s nr. 72, datë 13.5.2015”..	8472
Kërkesë e Ministrisë së Infrastrukturës dhe Energjisë nr. 2497/4, datë 21.7.2020	Për shpronësim, për interes publik, të pasurive të paluajtshme, pronë private, që preken nga ndërtimi i objektit “Rrjeti shpërndarës 20 kV, nënstationi Pogradec, fideri 1, 9, 10, rikonstrukcion kabina, kabina të reja dhe linjë TU me përcjellës me vetëmbajtje ABC”.....	8473
Njoftim i Ministrisë për Evropën dhe punët e Jashtme nr. 8477, datë 23.7.2020	Mbi hyrjen në fuqi të një marrëveshjeje ndërkombëtare.....	8475
	Kërkesë për shpalljen të vdekur të shtetasit Edmond Dinaku.....	8475



LIGJ
Nr. 85/2020

**PËR DISA NDRYSHIME DHE SHTESA
NË LIGJIN NR. 10 192, DATË 3.12.2009,
“PËR PARANDALIMIN DHE GODITJEN
E KRIMIT TË ORGANIZUAR,
TRAFIKIMIT, KORRUPSIONIT DHE
KRIMEVE TË TJERA NËPËRMJET
MASAVE PARANDALUESE KUNDËR
PASURISË”, TË NDRYSHUAR**

Në mbështetje të neneve 78 e 83, pika 2, të Kushtetutës, me propozimin e Këshillit të Ministrave,

**KUVENDI
I REPUBLIKËS SË SHQIPËRISË**

VENDOSI:

Në ligjin nr. 10 192, datë 3.12.2009, “Për parandalimin dhe goditjen e krimit të organizuar, trafikimit, korrupsionit dhe krimeve të tjera nëpërmjet masave parandaluese kundër pasurisë”, të ndryshuar, bëhen këto ndryshime dhe shtesa:

Neni 1

Në pikën 3 të nenit 13 fjalët “dhe administratori i pasurisë” hiqen.

Neni 2

Në nenin 14 bëhen këto ndryshime:

1. Në pikën 3 fjalët “administratori i saj” zëvendësohen me fjalët “Agjencia e Administrimit të Pasurive të Sekuestruara dhe të Konfiskuara”.

2. Në pikën 5 fjalët “administratori i emëruar” zëvendësohen me fjalët “Agjencia e Administrimit të Pasurive të Sekuestruara dhe të Konfiskuara”.

3. Në pikat 8 dhe 9 fjala “administratori” zëvendësohet me fjalët “Agjencia e Administrimit të Pasurive të Sekuestruara dhe të Konfiskuara”.

Neni 3

Neni 15 ndryshohet si më poshtë:

“Neni 15

Administratori i pasurisë së sekuestruar

1. Gjykata në vendimin e sekuestrimit të pasurisë cakton Agjencinë e Administrimit të Pasurive të Sekuestruara dhe të Konfiskuara si administratore të këtyre pasurive. Agjencia vë në dispozicion të gjykatës listën e administratorëve të punësuar pranë saj të paktën 1 (një) herë në vit dhe tregon kriteret e caktimit të tyre.

2. Agjencia e Administrimit të Pasurive të Sekuestruara dhe të Konfiskuara mund të kërkojë ndihmën e ekspertëve ose të personave të tjerë, të cilët shpërblehen për punën e bërë.”.

Neni 4

Në nenin 16 bëhen këto ndryshime:

1. Titulli i nenit ndryshohet dhe bëhet “Detyrat e Agjencisë së Administrimit të Pasurive të Sekuestruara dhe të Konfiskuara”.

2. Në pikën 1 bëhen ndryshimet e mëposhtme:

a) Fjala “Administratori” zëvendësohet me fjalët “Agjencia e Administrimit të Pasurive të Sekuestruara dhe të Konfiskuara”.

b) Në fjalinë e dytë për emrin “ai” zëvendësohet me për emrin “ajo”.

3. Në pikën 2 fjalët “Administratori, i caktuar me vendim gjykate” zëvendësohen me fjalët “Agjencia e Administrimit të Pasurive të Sekuestruara dhe të Konfiskuara”.

4. Pika 3 ndryshohet si më poshtë:

“3. Gjykata ose prokurori mund t'i kërkojë Agjencisë së Administrimit të Pasurive të Sekuestruara dhe të Konfiskuara në çdo kohë informacion për mënyrën e administrimit të pasurisë. Ky informacion jepet nga Agjencia brenda 10 ditëve nga marrja e kërkesës.

Neni 5

Në nenin 17 bëhen këto ndryshime:

1. Titulli i nenit ndryshohet dhe bëhet “Ndalime për Agjencinë e Administrimit të Pasurive të Sekuestruara dhe të Konfiskuara”.

2. Në paragrafin e parë fjalët “nga gjykata, administratori” zëvendësohen me emërtesat “Komiteti Ndërinstitucional për Masat Kundër Krimit të Organizuar, Agjencia e Administrimit të Pasurive të Sekuestruara dhe të Konfiskuara”.



3. Në paragrafin e dytë fjalët “Administratori nëpërmjet Agjencisë së Administrimit të Pasurive të Sekuestruara dhe të Konfiskuara i paraqet prokurorit” zëvendësohen me fjalët “Agjencia e Administrimit të Pasurive të Sekuestruara dhe të Konfiskuara i paraqet Komitetit Ndërinstitucional për Masat Kundër Krimit të Organizuar”.

4. Paragrafi i tretë ndryshohet si më poshtë:

“Komiteti Ndërinstitucional për Masat kundër Krimit të Organizuar shprehet me vendim nëse e miraton ose e rrëzon kërkesën e Agjencisë.”.

Neni 6

Në nenin 18 bëhen këto ndryshime:

1. Titulli i nenit ndryshohet dhe bëhet “Raportimet e Agjencisë”.

2. Në pikën 1 fjalët “emërimi i tij, administratori” zëvendësohen me fjalët “ngarkimi me administrimin e pasurisë, Agjencia e Administrimit të Pasurive të Sekuestruara dhe të Konfiskuara”. Ndërsa në fjalinë e dytë fjalët “sipas afateve të përcaktuara nga gjykata, administratori” zëvendësohen me fjalët “me kërkesë të gjykatës, Agjencia”.

3. Në pikën 2 fjalët “administratori është i” zëvendësohen me “Agjencia e Administrimit të Pasurive të Sekuestruara dhe të Konfiskuara është e”.

4. Në pikën 3 fjala “Administratori” zëvendësohet me fjalët “Agjencia e Administrimit të Pasurive të Sekuestruara dhe të Konfiskuara” dhe fjalët “prokurorit dhe Agjencisë së Administrimit të Pasurive të Sekuestruara dhe të Konfiskuara ” zëvendësohen me fjalët “edhe prokurorit”.

Neni 7

Pika 1 e nenit 19 ndryshohet si më poshtë:

“1. Për pasuritë, të cilat dëmtohen, u bie vlera në mënyrë të ndjeshme ose dalin jashtë përdorimit, me kërkesë të Agjencisë së Administrimit të Pasurive të Sekuestruara dhe të Konfiskuara, Komiteti Ndërinstitucional për Masat Kundër Krimit të Organizuar vendos kalimin e të drejtave reale tek të tretët, nisur nga parimet e miradministrimit të pasurisë. Të drejtat reale nuk kalohen te personat e parashikuar në pikat 1 dhe 2

të nenit 3 të këtij ligji. Komiteti vendos pasi dëgjon palët dhe ekspertin vlerësues.”.

Neni 8

Në nenin 20 bëhen këto ndryshime:

1. Në pikën 1 fjala “administratori” zëvendësohet me fjalët “Agjencia e Administrimit të Pasurive të Sekuestruara dhe të Konfiskuara”

2. Në pikën 2 fjalët “administratori ose” hiqen.

Neni 9

Në nenin 30 bëhen këto ndryshime:

1. Pika 1 ndryshohet si më poshtë:

“1. Komiteti Ndërinstitucional për Masat Kundër Krimit të Organizuar, bazuar në rekomandimet dhe raportin e vlerësimit të Agjencisë së Administrimit të Pasurive të Sekuestruara dhe të Konfiskuara, vendos mënyrën e përdorimit të pasurive të konfiskuara, sipas këtij ligji, në përputhje me nenet 32 e 33 të tij. Vendimi i komitetit i njoftohet ministrit përgjegjës për financat.”.

2. Në pikën 2 fjalët “ministrit të Financave” zëvendësohen me fjalët “Komitetit Ndërinstitucional për Masat Kundër Krimit të Organizuar”.

3. Në pikën 3 fjalët “ministri i Financave, me urdhër” zëvendësohen me fjalët “Komiteti Ndërinstitucional për Masat Kundër Krimit të Organizuar, me vendim, i cili i njoftohet ministrit përgjegjës për financat” dhe fjalët “nxjerr udhëzimet shoqëruese të përdorimit” hiqen.

Neni 10

Në nenin 31 fjala “gjykata” zëvendësohet me fjalën “Agjencia”

Neni 11

Në nenin 32 bëhen këto ndryshime:

1. Paragrafi i parë ndryshohet si më poshtë:

“Administratori i caktuar nga Agjencia kryen veprimet e nevojshme për të dorëzuar në llogaritë e Agjencisë së Administrimit të Pasurive të Sekuestruara dhe të Konfiskuara fondet në mjete monetare.”.



2. Fjalja e dytë e shkronjës “b” ndryshohet si më poshtë:

“Nëse procedurat e shitjes nuk janë ekonomike, Komiteti Ndërinstitucional për Masat Kundër Krimit të Organizuar i propozon ministrit përgjegjës për ekonominë ndjekjen e procedurave ligjore për transferimin e pronësisë pa pagesë ose shkatërrimin e pasurisë së konfiskuar.”.

3. Në shkronjën “c” pas fjalës “anulohen” shtohen fjalët “nga Komiteti Ndërinstitucional për Masat Kundër Krimit të Organizuar”.

Neni 12

Në pikën 1 të nenit 33 fjalët “ministrit të Financave ” zëvendësohen me fjalët “ministrit përgjegjës për ekonominë dhe të ministrit përgjegjës për rendin dhe sigurinë publike” dhe fjalët “nga ky ligj” zëvendësohen me fjalët “nga legjislacioni në fuqi”.

Neni 13

Në pikën 2 të nenit 34 fjalët “nga Këshilli i Ministrave” zëvendësohen me fjalët “me ligj të posaçëm”.

Neni 14

Në nenin 35 bëhen këto ndryshime dhe shtesa:

1. Titulli i nenit ndryshon dhe bëhet “Komiteti Ndërinstitucional për Masat Kundër Krimit të Organizuar”.

2. Pikat 1 dhe 2 ndryshohen si më poshtë:

“1. Për mbikëqyrjen e administrimit të pasurive të sekuestruara dhe të konfiskuara nga Agjencia e Administrimit të Pasurive të Sekuestruara dhe të Konfiskuara, si dhe për marrjen e vendimeve për destinacionin e pasurive të sekuestruara dhe të konfiskuara ngrihet dhe funksionon Komiteti Ndërinstitucional për Masat Kundër Krimit të Organizuar. Ky komitet mblidhet pranë ministrisë përgjegjëse për rendin dhe sigurinë publike.

2. Komiteti përbëhet nga 9 (nëntë) anëtarë, të propozuar respektivisht nga ministri përgjegjës për rendin dhe sigurinë publike, ministri përgjegjës për çështjet e ekonomisë, ministri përgjegjës për çështjet e drejtësisë, ministri përgjegjës për çështjet sociale, Prokurori i Përgjithshëm, Prokuroria e Posaçme Kundër Korrupsionit dhe Krimit të

Organizuar, Njësia e Administrimit të Buxhetit Gjyqësor, Agjencia Shtetërore e Kadastrës dhe Agjencia e Administrimit të Pasurive të Sekuestruara dhe të Konfiskuara. Anëtari i propozuar nga ministri përgjegjës për rendin dhe sigurinë publike është kryetar i komitetit. Agjencia e Administrimit të Pasurive të Sekuestruara dhe të Konfiskuara ushtron funksionin e sekretariatit teknik pranë komitetit.”.

3. Në pikën 5 fjalët “Ministrisë së Financave ” zëvendësohen me fjalët “ministrisë përgjegjëse për rendin dhe sigurinë publike” dhe fjalët “brenda buxhetit të shtetit” zëvendësohen me fjalët “të krijuara nga Agjencia”.

4. Fjalja e parë e pikës 7 ndryshohet si më poshtë:

“Komiteti mblidhet sa herë të jetë e nevojshme, me kërkesë të njërit prej anëtarëve ose të Agjencisë, por jo më pak se 1 (një) herë në 3 (tre) muaj.”.

5. Pas pikës 7 shtohet pika 8 me këtë përmbajtje:

“8. Masa dhe mënyrat e shpërblimit të anëtarëve të Komitetit përcaktohen me vendim të Këshillit të Ministrave.”.

Neni 15

Në nenin 36, fjalët “ministri i Financave” zëvendësohen me fjalët “ ministri përgjegjës për rendin dhe sigurinë publike”.

Neni 16

Në nenin 37 bëhen këto ndryshime:

1. Fjalja e dytë e pikës 1 ndryshohet si më poshtë:

“Fondi i posaçëm është një zë më vete në buxhetin e Agjencisë dhe administrohet me vendim nga Komiteti.”.

2. Në pikën 2 bëhen ndryshimet si më poshtë:

a) në shkronjën “a” fjalët “Prokurorisë së Posaçme” zëvendësohen me “Prokurorisë së Posaçme Kundër Korrupsionit dhe Krimit të Organizuar, ministrisë përgjegjëse për rendin dhe sigurinë publike”.

b) shkronja “b” ndryshohet si më poshtë:

“b) përmirësimin e parandalimit të kryerjes së veprave penale, të hetimeve paraprake penale të krimit të organizuar ose krimeve të tjera ,që sjellin pasuri/produkte kriminale dhe zhvillimin e



programeve të mbrojtjes së dëshmitarëve e të bashkëpunëtorëve të drejtësisë, duke destinuar pasuritë në administrim të ministrisë përgjegjëse për rendin dhe sigurinë publike.”.

c) Pas shkronjës “ç” shtohet shkronja “d” me këtë përmbajtje:

“d) për mbulimin e diferencave në vlerë që mund të krijohen nga administrimi i pasurive, të cilat me vendim gjyqësor i kthehen pronarit të pasurisë së sekuestruar ose të konfiskuar.”.

3. Në pikën 4 fjalët “të ekspertëve” hiqen.

4. Pikat 5 e 6 ndryshohen dhe shtohen pikat 7 e 8 me këtë përmbajtje:

“5. Komiteti, me vendim, përcakton financimin e projektit dhe mënyrat e përdorimit të fondit të vënë në dispozicion të kërkuar.”.

6. Deri më 31.12.2020 fondi që shërben për parandalimin e kryerjes së veprave penale, në funksion të veprimtarisë së Policisë së Shtetit dhe të Prokurorisë së Posaçme Kundër Korrupsionit dhe Krimit të Organizuar, nuk mund të jetë më i vogël se 60 (gjashtëdhjetë) për qind e të ardhurave të përgjithshme.

7. Të ardhurat e papërdorura nga fondi i posaçëm për parandalimin e kriminalitetit transferohen në vitin buxhetor pasardhës të Agjencisë.

8. Pjesa e fondit, e destinuar sipas pikës 2 të këtij neni, mund të përdoret për shpërblime të funksionarëve të institucioneve përfituese deri në masën 5 (pesë) për qind të tij.”.

Neni 17

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miraturar në datën 2.7.2020.

Shpallur me dekretin nr. 11559, datë 22.7.2020 të Presidentit të Republikës së Shqipërisë, Ilir Meta

DEKRET

Nr. 11559, datë 22.7.2020

PËR SHPALLJE LIGJI

Në mbështetje të nenit 84, pika 1, dhe nenit 93 të Kushtetutës,

DEKRETOJ:

Shpalljen e ligjit nr. 85/2020, “Për disa ndryshime dhe shtesa në ligjin nr. 10192, datë 3.12.2009, ‘Për parandalimin dhe goditjen e krimit të organizuar, trafikimit, korrupsionit dhe krimeve të tjera nëpërmjet masave parandaluese kundër pasurisë’, të ndryshuar”.

PRESIDENT I REPUBLIKËS
SË SHQIPËRISË
Ilir Meta

VENDIM

Nr. 106, datë 2.7.2020

MBI MIRATIMIN E RREGULLAVE TË TREGUT SHQIPTAR TË BALANCIMIT TË ENERGJISË ELEKTRIKE

Në mbështetje të neneve 16, 19, 62, 98, 99 dhe 100, të ligjit nr. 43/2015 “Për sektorin e energjisë elektrike”, i ndryshuar, si dhe nenit 26 të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e datës 2.7.2020, mbasi shqyrtoi relacionin nr. 78/5 prot., datë 29.6.2020, të përgatitur nga drejtoritë teknike, “Mbi miratimin e rregullave të tregut shqiptar të balancimit të energjisë elektrike”,

konstatoi se:

- Bordi i ERE-s, me vendimin nr. 118, datë 22.7.2019, ka vendosur të fillojë procedurën për miratimin e “Rregullave të tregut shqiptar të balancimit të energjisë elektrike”, bashkë me anekset përkatëse, të propozuara nga shoqëria “OST” sh.a.

- Drafti i “Rregullave të Tregut Shqiptar të Balancimit të Energjisë Elektrike”, i paraqitur nga shoqëria “OST” sh.a., për miratim, është i strukturuar në njëmbëdhjetë kapituj dhe tri anekse.



- “Rregullat e Tregut Shqiptar të Balancimit të Energjisë Elektrike” miratohen dhe monitorohen nga Enti Rregullator i Energjisë (ERE).

- Shoqëria “OST” sh.a., thekson në kërkesën e saj se, implementimi i tregut balancues është parashikuar të kalojë në dy faza:

- Faza e parë do të jetë miratimi i këtyre rregullave.

- Faza e dytë do të jetë faza implementuese pa efekte financiare (*Dry run*). Gjatë kësaj faze “OST” sh.a., do të asistohet nga asistenca teknike e zgjedhur prej financuesit dhe parashikohet që problematikën që do evidentohen gjatë kësaj faze do të reflektohen në propozime të mundshme për ndryshime të këtyre rregullave që janë përcjellë për miratim.

Për sa sa më sipër “OST” sh.a. kërkon:

- Miratimin e draft “Rregullave të Tregut Shqiptar të Balancimit të Energjisë Elektrike”, me qëllim zbatimin e periudhës së implementimit të tyre për një periudhë testi (*Dry run*) pa efekte financiare mbi palët.

- Pas përfundimit të kësaj periudhe të implementimit shoqëria “OST” sh.a. do të paraqesë në Entin Rregullator të Energjisë (ERE), për miratim “Rregullat Përfundimtare të Tregut të Balancimit të Energjisë Elektrike”.

- Me anë të shkresës nr. 330 prot., datë 31.07.2019, Enti Rregullator të Energjisë (ERE) njoftoi të gjitha palët e interesit lidhur me vendimin e tij me nr. 118, datë 22.07.2019

- Në vijim të këtij njoftimi shoqëria “Devoll Hydropower” sh.a., nëpërmjet shkresës Ref-TR-2019-00869, datë 28.10.2019, protokolluar në ERE me nr. 630/2 prot., datë 28.10.2019, kërkoj shtyrje afati për komentet lidhur me këto rregulla, por edhe pas këtyre afateve nuk rezultoi ndonjë koment nga palët e interesit.

- Në mënyrë që të diskutohej më tej mbi disa aspekte të parashikimeve të këtyre rregullave dhe të merrej opinioni i palëve të interesit, ERE me datë 10.10.2019, zhvilloi një seancë dëgjimore me palët e interesit.

- Gjatë kësaj seance dëgjimore, rezultoi se palët ishin dakort me sa parashikuar në këto draft-rregulla duke evidentuar që rregullat do të shërbejnë në përmirësimin e praktikave dhe trajtimin e çështjeve të tregut të balancimit.

- Shoqëria “OST” sh.a., bën me dije se matja e energjisë tashmë e ofron matjen 15-minutëshe,

dhe po punohet për konfigurimet në mënyrë që të bëhet edhe përlllogaritja në këto frekuenca kohore sipas standarteve më të mira.

- Autoriteti i Konkurrencës (AK) me anë të shkresës 554/2, datë 23.12.2019, ka përcjellë në ERE vendimin e Komisionit të Konkurrencës nr.670, datë 26.12.2019, “Për dhënien e disa rekomandimeve Entit Rregullator të Energjisë (ERE) në lidhje me shqyrtimin e procedurave për miratimin e Rregullave të Tregut Shqiptar të Balancimit të Energjisë Elektrike”, me anë të të cilit i rekomandon ERE-s që gjatë procedurës së miratimit të Rregullave të Tregut Shqiptar të Balancimit të Energjisë Elektrike, për të siguruar përmbushjen e detyrimeve të shërbimit publik, të marrë në konsideratë edhe disa rekomandime të saj.

- Me qëllim për të diskutuar në lidhje me rekomandimet e Autoritetit të Konkurrencës (AK), Enti Rregullator i Energjisë (ERE), më datë 6.2.2020, ka zhvilluar një seancë dëgjimore me përfaqësuesit e “OST” sh.a. dhe Autoritetit të Konkurrencës (AK), në mënyrë që të qartësoheshin dhe të vlerësoheshin argumentet e “OST” sh.a., për këto rekomandime.

- Gjatë kësaj seance dëgjimore përfaqësuesit e “OST” sh.a., sqaruan edhe një herë sa evidentuar dhe rekomanduar nga Autoriteti i Konkurrencës (AK), për të cilat përfaqësuesi i Autoritetit i Konkurrencës (AK) u shpreh që u qartësua dhe u morën sqarimet e nevojshme. Autoriteti i Konkurrencës (AK) propozoi që në këtë rregullore, në rastet kur “OST” sh.a., rezulton me të ardhura të tepërta, këto të ardhura të shpërndahen tek klientët. Një propozim i tillë, do të binte ndesh me parimet mbi të cilat është ndërtuar kjo rregullore si dhe parashikimet ligjore në fuqi, të cilat parashikojnë se “OST” sh.a. si ofrues i shërbimit të balancimit duhet të garantojë që palët përgjegjëse për balancimin të paguajnë vetëm për disbalancat që shkaktojnë, pa gjeneruar të ardhura shtesë apo humbje për “OST” sh.a.

- Gjithashtu, OST sh.a. në këtë seancë shprehu që në ERE ka kërkuar miratim paraprak pa efekte financiare të këtyre rregullave, me qëllim zbatimin gjatë periudhës *Dry run* që do zgjasë 6 (gjashtë) muaj nga data e miratimit dhe një periudhë implementimi të këtyre rregullave prej 2 (dy) muajsh ndërkohë që këto periudha siç



bëri me dije “OST” sh.a., do i shërbejnë për përmirësimin e përmbajtjes së këtyre rregullave dhe për evidentimin e vështirësive në implementim.

- Draft-Rregullat e Tregut Shqiptar të Balancimit të Energjisë Elektrike, janë konsultuar edhe me USAID nëpërmjet komunikimit elektronik, dhe në përgjigje të ftesës së Entit Rregullator të Energjisë (ERE) për opinione USAID ka përcjellë në ERE qëndrimin në lidhje me draftin e Rregullave për të cilat ERE ka filluar procedurën.

- Komentet dhe rekomandimet e USAID që janë vlerësuar se përmirësojnë dispozita të këtij dokumenti janë reflektuar në të.

- Komentet e USAID të cilat japin një orientim apo propozim të përgjithshëm në lidhje me dispozitat e kësaj rregulloreje në të cilat në vlerësim të USAID duhet ndërhyrë me qëllim përmirësimin e gjuhës, përshkrimit apo propozime që nuk lidhen me objektin e këtij dokumenti, nuk janë pranuar, duke vlerësuar se kuadri ligjor rregullator ka saktësuar e sanksionuar mjaftueshëm si terminologjinë e termave teknike ashtu edhe sferën e kufizimit apo shtrirjes së të drejtave dhe detyrimeve të palëve.

- Konstatohet se “OST” sh.a., në cilësinë e draftuesit të këtyre rregullave mundet të adresojë çdo nevojë për ndryshime të këtyre rregullave në Entin Rregullator të Energjisë (ERE), në formën e kërkesës apo propozimeve për shqyrtim të ndryshimeve.

- Modeli i marrëveshjes së Ofruesit të Shërbimit të Balancimit (OSHB), modeli i marrëveshjes së Palës Përgjegjëse Balancuese (PPB), formulari i deklarimit; informacioni i PPB-së mbi personat përgjegjës për çështje të tregtisë dhe shlyerjes; kërkesë për kontratë pala përgjegjëse për balancimin si dhe informacioni i OSHB-së mbi personat përgjegjës për çështje të tregtisë dhe shlyerjes, janë pjesë integrale e rregullave të tregut shqiptar të balancimit të energjisë elektrike.

Për gjithë sa më sipër cituar, bordi i ERE-s

VENDOSI:

1. Miratimin e “Rregullave të Tregut Shqiptar të Balancimit të Energjisë Elektrike”. (bashkëlidhur)

2. “Rregullat e Tregut Shqiptar të Balancimit të Energjisë Elektrike” hyjnë në fuqi pas botimit dhe do të zbatohen nga pjestarët e tregut të energjisë elektrike pa efekte financiare deri në datën 31.12.2020.

3. Brenda datës 30.11.2020, shoqëria “OST” sh.a., të përcjellë në Entin Rregullator të Energjisë (ERE), një raport vlerësimi për zbatimin e këtyre rregullave pa efekte financiare për këtë periudhë. Raporti i vlerësimit duhet të evidentojë qartë dhe me argumentat përkatëse nëse është e nevojshme rishikimi i tyre, përpara aplikimit të Rregullave të Tregut të Balancimit me efekte financiare.

4. Me përfundimin e periudhës së shprehur në pikën 2, “Rregullat e Përkohshme për Mekanizimin Balancues të Energjisë Elektrike”, miratuar me vendimin e Bordit të ERE-s nr.193, datë 24.11.2017, shfuqizohen.

5. Shoqëria “OST” sh.a., të raportojë dhe dokumentojë çdo muaj në lidhje me ecurinë e zbatimit të Rregullave të Tregut Shqiptar të Balancimit të Energjisë Elektrike.

6. Drejtoria e Çështjeve Ligjore, të njoftojë palët e interesit për vendimin e bordit të ERE-s.

Ky vendim hyn në pas botimit në Fletore Zyrtare.

Për këtë vendim mund të kërkohet rishikim në ERE, brenda 7 ditëve kalendarike, si dhe mund të bëhet ankimi në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti



RREGULLAT E TREGUT SHQIPTAR TË BALANCIMIT TË ENERGJISË ELEKTRIKE

Përmbajtja

RREGULLAT E TREGUT SHQIPTAR TË BALANCIMIT TË ENERGJISË ELEKTRIKE

1. DISPOZITA TË PËRGJITHSHME

1.1 Qëllimi dhe objektivi

1.1.1 Qëllimi

1.1.2 Objektivi

1.2 Fjalor dhe marrëveshje

1.2.1 Marrëveshje

1.2.2 Fjalor

2. BAZA LIGJORE

3. MIRATIMI DHE RISHIKIMI

4. FUSHËVEPRIMI

4.1 Rolet dhe përgjegjësitë

4.1 OST sh.a.

4.1.3 PPB

4.2 Detyrimet mbi të gjitha Palët e Lidhura

5. BALANCIMI I SISTEMIT

5.1 Specifikimi i masave që duhet të merren nga OST-ja në rastin e disbalancave në sistem

5.2 Përgjegjësia e balancimit

5.2.1 Përkufizime

5.2.2 Njohja si PPB

5.2.3 Regjistri i Palëve Përgjegjëse Balancuese

5.3 Procesi i Nominimeve të Energjisë

5.3.1 Procesi i nominimit

5.4 Procesi i shkëmbimit të të dhënave të matjes

5.5 Rregullat Operative në lidhje me nominimet dhe shkëmbimin e të dhënave të matjes

5.5.1 Rregullat në lidhje me nominimet

5.6 Çmimi i disbalancave

5.7 Kërkesat e kolateralit të PPB-së

5.7.6 Garancitë financiare ndryshojnë në varësi të llojit të PPB-së

5.8 Faturimi dhe shlyerja për PPB-në

5.8.1 Faturimi

5.8.2 Fatura e disbalancave

5.8.3 Afati i pagesës

5.8.4 Kundërshtimet

5.8.5 Modalitetet për mbledhjen e çdo shume të papaguar

5.9 Procesi i ndryshimit të PPB-së

5.9.1 PPB-ja përfundon shërbimet e saj

5.9.2 Ndryshimi i PPB-së në një pikë lidhje

5.9.3 Mundësia e fundit e balancimit

6. Produktet dhe përkufizimi i tyre

6.1 Lista e produkteve

6.2 Rezervat e mbajtjes së frekuencës (FCR) (Rezervat primare)

6.3 Rezervat e rivendosjes së frekuencës të aktivizuara automatikisht (aFRR)

6.4 Rezerva e rivendosjes së frekuencës e aktivizuar manualisht (mFRR)

6.5 Rezerva zëvendësuese (RR)

6.6 Rezervat e emergjencës (ER)

7. PARAKUALIFIKIMI

8. PROCESI I ANGAZHIMIT MBI DISPONUESHMËRINË DHE SHPËR- NDARJEN

9. PROCESI I AKTIVIZIMIT

9.1 FCR

9.2 aFRR

9.3 mFRR/RR me kohë aktivizimi ≤ 30 min.

9.4 Rezervat e emergjencës

9.5 Rezerva zëvendësuese me kohë aktivizimi > 30 min.

10. FATURIMI DHE SHLYERJA PËR OSHB-në

11. MENAXHIMI I KONGJESTIONEVE TË BRENDASHME

12. ANEKSET

12.1 Modeli i Marrëveshjes së OSHB-së (në një dokument të veçantë)

12.2 Modeli i Marrëveshjes së PPB-së (në një dokument të veçantë)

12.3 Përcaktimi i çmimeve të disbalancave

I. DISPOZITA TË PËRGJITHSHME

1.1 Qëllimi dhe objektivi

1.1.1 Qëllimi

1.1.1.1 Qëllimi i Rregullave të Tregut Shqiptar të Balancimit është të:

a) themelojnë menaxhimin me bazë tregu të balancimit të sistemit elektroenergetik, që operohet nga Operatori i Sistemit të Transmetimit;

b) përcaktojnë marrëdhëniet ndërmjet pjesëmarrësve të tregut në tregun e balancimit;

c) mundësojnë përgjegjësi të qarta të balancimit për pjesëmarrësit e tregut;

d) përshkruajnë të drejtat dhe përgjegjësitë e ofruesve të shërbimit të balancimit,

e) krijojnë një mekanizëm për përcaktimin e çmimit të shërbimeve balancuese të prokuruar nga OST-ja, si dhe mekanizmin për llogaritjen e çmimit të shlyerjes së disbalancave dhe pagesave financiare të disbalancave për Palët Përgjegjëse të Balancimit; dhe



f) çështje të tjera që lidhen me operimin e tregut balancues.

1.1.2 Objektivi

1.1.2.1 Objektivi i Rregullave të Tregut Shqiptar të Balancimit është krijimi i një mekanizmi balancues eficient, transparent dhe jodiskriminues që përcakton përgjegjësitë e balancimit dhe nxit pjesëmarrësit e tregut të kryejnë balancimin, si dhe të ofrojnë shërbime balancuese.

1.2 Fjalor dhe marrëveshje

1.2.1 Marrëveshje

1.2.1.1 Në këto Rregulla të Tregut Shqiptar të Balancimit, me përjashtim të rastit kur citohet ndryshe:

a) numri njëjës përfshin numrin shumës dhe anasjelltas;

b) referimi për çdo gjini përfshin edhe gjininë tjetër;

c) referimi në çdo dokument ligjor ose akt nënkupton dokumentin ligjor ose aktin siç është në fuqi sipas rastit, në përputhje me termat e tij; me kusht që referimi të Rregullat e Tregut nënkupton Rregullat e Tregut që janë në fuqi në datën kur janë miratuar këto Rregulla të TSHB-së;

1.2.2 Fjalor

aFRR	Rezervat për rivendosjen automatike të frekuencës
PPB	Pala Përgjegjëse për Balancimin
OSHB	Ofrues i Shërbimit të Balancimit
Zonë kontrolli	Zonë kontrolli LFC
Bllok kontrolli	Bllok kontrolli LFC
NgM	Ngarkesë e menaxhueshme
EBGL	Udhëzuesi mbi Balancimin e Energjisë në Evropë
ENTSO-E	Rrjeti Evropian i Operatorëve të Sistemit të Transmetimit të Energjisë Elektrike
ERE	Enti Rregullator i Energjisë
FCR	Rezervat për mbajtjen e frekuencës
FRR	Rezervat për rivendosjen e frekuencës
Brenda ditës (ID)	Brenda ditës ose rritës / zbritës
Tregu brenda ditës (IDM)	Tregu brenda ditës
PShD	Periudha e Shlyerjes së Disbalancave
KESH	Korporata Elektroenergjitike Shqiptare
LFC	Rregullimi ngarkesë-frekuencë
NC LFC&R	Kodi i Kontrollit Fuqi-Frekuencë (tashmë pjesë e SOGL)
L _{max}	Ngarkesa maksimale në sistem
LRR	Rezervat e mundësisë së fundit
mFRR	Rezervat e rivendosjes manuale të frekuencës
OSSH	Operatori i Sistemit të Shpërndarjes
OST sh.a.	Operatori i Sistemit të Transmetimit
BShE	Bursa e energjisë, që organizon tregun e ditës në avancë dhe brenda ditës
RR	Rezervat zëvendësuese
SOGL	Udhëzuesi për Operimin e Sistemit i EN N-E

d) referimet në çdo legjislacion përfshijnë referimet për çdo amendim ose rimiratim të këtij legjislacioni si dhe çdo legjislacion që ka zëvendësuar atë legjislacion; dhe

e) referimet në dokumentet ose aktet ligjore do të konsiderohen që u refohen të gjitha shtesave ose amendimeve të tyre.

1.2.1.2 Në këto Rregulla të Tregut Shqiptar të Balancimit:

a) koha – do të jenë me orën lokale në Shqipëri.

b) monedha – monedha e përdorur në këto Rregulla të TSHB-së do të jetë në euro pasi tregjet e organizuara *ex-ante* të energjisë elektrike likuidohen në këtë monedhë.

c) njësitë – të gjitha njësitë teknike shprehen në sistemin ndërkombëtar të njërive (SI). Gjenerimi, transmetimi dhe konsumi i energjisë elektrike shprehen në kWh (MWh, GWh), në mënyrë të ngjashme gjenerimi, transmetimi dhe konsumi i energjisë reaktive shprehet në kVARh (MVARh). Kapaciteti ose kërkesa ose fuqia shprehen në kW (MW).



2. BAZA LIGJORE

2.1 Ligji “Për sektorin e energjisë elektrike”, nr. 43/2015, i ndryshuar, përcakton “balancimin” si tërësinë e veprimeve dhe proceseve përmes të cilave Operatori i Sistemit të Transmetimit (OST) operon dhe ruan frekuencën e sistemit brenda kufijve të paracaktuar të qëndrueshmërisë. Tregu Balancues përcaktohet si një menaxhim me bazë tregu i veprimeve për balancimin e sistemit elektroenergjitik, i operuar nga OST-ja.

2.2 Rregullat TShB u hartuan si një dokument plotësues i Rregullave të Tregut, sipas ligjit “Për sektorin e energjisë elektrike”, i cili parashikon që Rregullat e Tregut do të përfshijnë balancimin e energjisë elektrike: neni 51, pika 1(b), neni 51, pika 2 (c); neni 98, neni 99, pika 2 dhe neni 3 “Përkufizime”, pika 59.

2.3 Rregullat e Tregut Shqiptar të Balancimit bazohen mbi parimin e trajtimit të barabartë dhe mosdiskriminimit të të gjithë pjesëmarrësve të tregut si dhe transparencës në komunikim dhe sjelljes korrekte midis OST-së dhe pjesëmarrësve të tregut (përfshirë PPB-në dhe OSHB-në). Në rast të ndonjë mospërputhje midis dispozitave që lidhen me balancimin, të vendosura sipas këtyre Rregullave të Tregut Shqiptar të Balancimit dhe Rregullave të Tregut, këto Rregulla do të mbizotërojnë.

3. MIRATIMI DHE RISHIKIMI

3.1 Miratimi i Rregullave të Tregut Shqiptar të Balancimit

3.1.1 Sipas nenit 98 të ligjit “Për sektorin e energjisë elektrike”, ERE, me propozimin e OST sh.a. dhe në bashkëpunim me të gjithë pjesëmarrësit e sektorit të energjisë elektrike, miraton Rregullat e tregut të energjisë elektrike, ku përfshihen rregullat për planifikimin, dispecerimin, balancimin, zgjidhjen e mosmarrëveshjeve dhe kërkesat për menaxhimin e rezervës.

3.1.2 Këto Rregulla të Tregut Shqiptar të Balancimit do të konsiderohen si Treg Balancues pjesë e Rregullave të Tregut, të parashikuara në Ligjin “Për sektorin e energjisë elektrike”, dhe si të tilla ndjekin procesin e hartimit dhe miratimit të përshkruar më sipër.

3.2 Hyrja në fuqi e Rregullave të Tregut Shqiptar të Balancimit

3.2.1 Rregullat TShB hyjnë në fuqi me miratimin e tyre nga Bordi i ERE-s. Duke pasur parasysh nenin 2 të VKM-së nr. 519, datë

13.7.2016 “Për miratimin e Modelit të Tregut të Energjisë Elektrike” dhe nenin 100, pika 3, të ligjit nr. 43/2015 “Për sektorin e energjisë elektrike”, të ndryshuar, ERE shfuqizon edhe “Rregullat e përkohshme për mekanizmin balancues të energjisë elektrike”.

3.2.2 ERE dhe OST do të publikojnë Rregullat e Tregut Shqiptar të Balancimit në faqet e tyre të internetit.

3.3 Ndryshimi i Rregullave të Tregut Shqiptar të Balancimit

3.3.1 Rregullat TShB mund të ndryshohen bazuar në shkaqe të argumentuara nga OST sh.a., ERE ose nga çdo pjesëmarrës tregu nëpërmjet një kërkesë të drejtuar OST sh.a. OST sh.a. do të krijojë një Komitet përgjegjës për ndryshimin e Rregullave, i cili mund të iniciojë ndryshimin e Rregullave të Tregut Shqiptar të Balancimit dhe OST sh.a. do t'i paraqesë zyrtarisht ERE-s ndryshimin e propozuar.

3.3.2 Procesi i ndryshimit ndjek të njëjtën procedurë si ajo e miratimit të Rregullave të Tregut Shqiptar të Balancimit: ndryshimi i propozuar paraqitet nga OST sh.a. në ERE për miratim ose inicohet nga ERE pas konsultimit me OST sh.a.

3.3.3 OST-ja përgatit një raport i cili do të përfshijë regjistrimin e ankesave dhe/ose vërejtjeve të pjesëmarrësve të Tregut Shqiptar të Balancimit, si edhe çështjeve të identifikuar nga OST sh.a., të shoqëruara me veprimet korrigjuese përkatëse, nëse ka. Pas konsultimit të organizuar nga ERE, mund të përgatiten ndryshimet në këto Rregulla.

3.4 Procedura e zgjidhjes së mosmarrëveshjeve në Rregullat e Tregut Shqiptar të Balancimit (dhe në marrëveshjet e PPB-së dhe OSHB-së)

3.4.1 Në rast mosmarrëveshje, palët e përfshira në mosmarrëveshje do të përpiqen të zgjidhin atë në mirëkuptim, nëpërmjet negocimit ose ndonjë zgjidhje tjetër miqësore.

3.4.2 Në rast se mosmarrëveshja nuk mund të zgjidhet përmes mirëkuptimit, Pala/Palët mund të paraqesin mosmarrëveshjen e tyre tek ERE në përputhje me rregulloren për trajtimin e ankesave të paraqitura nga klientët dhe për zgjidhjen e mosmarrëveshjeve midis të licencuarve në sektorin e energjisë elektrike dhe gazit natyror, miratuar nga ERE (vendimi i Bordit të ERE-s nr. 114, datë 8.7.2016).



3.5 Procedura dhe kushtet për vendosjen e gjobave

3.5.1 ERE monitoron performancën e pjesëmarrësve të tregut në lidhje me zbatimin e këtyre rregullave dhe mund të vendosë gjoba në përputhje me “Rregulloren për kushtet dhe procedurat e vënies së gjobave” të parashikuar nga neni 107, pika 4, të ligjit “Për sektorin e energjisë elektrike”.

3.6 Elemente të tjera të këtyre rregullave

3.6.1 Çështje të tjera që nuk mbulohen nga këto Rregulla të Tregut Shqiptar të Balancimit, të tilla si: Kodi i sjelljes, çështjet e konfidencialitetit dhe rregullime të tjera, do të zbatohen në përputhje me dispozitat e Rregullave të Tregut në fuqi.

4. FUSHËVEPRIMI

4.1 Rolet dhe përgjegjësitë

4.1 OST sh.a.

4.1.1.1 OST sh.a. është Operatori i Sistemit të Transmetimit në Shqipëri, i cili është përgjegjës për ruajtjen e sigurisë së sistemit. Një nga kriteret e sigurisë së sistemit është balanca e sistemit. Për ta ruajtur atë, OST sh.a. do të jetë përgjegjëse për prokurimin e shërbimeve balancuese nga ofruesit e shërbimeve të balancimit (OSHB) në mënyrë që të garantojë sigurinë operacionale.

4.1.1.2 OST sh.a. është përgjegjëse për minimizimin e kostos së prokurimit të shërbimit të balancimit duke kontraktuar dhe aktivizuar rezervat më eficiente në kosto. Çdo vit, OST sh.a. duhet të përcaktojë madhësinë e rezervave balancuese të nevojshme.

4.1.1.3 OST sh.a. do të zbatojë një model të vetëdispeçerimit për përcaktimin e skeduleve të gjenerimit dhe të konsumit.

4.1.1.4 OST sh.a. është e detyruar të mbajë në balancë sistemin elektroenergjitik, duke mos shkaktuar diferenca në rezultatin neto me qëllim garantimin e neutralitetit të saj financiar të rregulluar lidhur me shërbimet e balancimit në përputhje me përcaktimet e Metodologjisë së Llogaritjes së Tarifave të Transmetimit të Energjisë Elektrike.

4.1.1.5 Vëllimi i plotë i nevojshëm i rezervës balancuese sipas përcaktimeve ligjore në fuqi dhe këtyre rregullave prokurohet me bazë tregu, në mënyrë transparente dhe jodiskriminuese.

4.1.1.6. Nëse vërtetohet se OSHB-ja nuk i përmbush më kushtet e parakualifikimit, OST sh.a. do të njoftojë OSHB-në me letër rekomande për

çështjen. Nëse brenda 15 ditëve pas marrjes së njoftimit, OSHB-ja nuk reagon mbi letrën rekomande dhe vazhdon të mbetet në papajtueshmëri me kushtet, OST sh.a. ka të drejtën të përfundojë Marrëveshjen me OSHB-në. Kjo nënkupton që nëse OSHB dëshiron të ofrojë shërbimin, pas përfundimit të marrëveshjes, duhet të riaplikojë nëpërmjet procedurës së parakualifikimit dhe të nënshkruajë një Marrëveshje të re me OST sh.a., në përputhje me kushtet përkatëse.

4.1.1.7 OST sh.a. ka të drejtën të vlerësojë, në çdo kohë gjatë periudhës së vlefshmërisë së Marrëveshjes së OSHB-së, nëse OSHB-ja është apo jo në pajtueshmëri me termat dhe kushtet e përmendura në këtë Marrëveshje të OSHB-së. Për të shmangur paqartësinë, kjo nuk përfshin të drejtën e OST-së për akses fizik në asetet e OSHB-së, kjo duke mos cenuar rregulloret e tjera p.sh Kodin e Transmetimit, lidhur me aksesin në instalimet e lidhjes së OSHB-së. Nëse vërtetohet se OSHB-ja nuk i përmbush më kushtet e Marrëveshjes së OSHB-së, OST sh.a. do të njoftojë OSHB-në me letër rekomande. Brenda 15 ditësh, OSHB-ja duhet të provojë se janë ndërmarrë masat e duhura. Në të kundërt Marrëveshja e OSHB do të pezullohet për 30 ditë. Pas periudhës së pezullimit, OST sh.a. vlerëson përsëri pajtueshmërinë e OSHB me kushtet. Nëse është rivendosur pajtueshmëria, pezullimi anulohet. Nëse jo, Marrëveshja me OSHB përfundon. Pas përfundimit të Marrëveshjes, nëse OSHB-ja dëshiron të ofrojë shërbimin, duhet të riaplikojë nëpërmjet procedurës së parakualifikimit dhe të nënshkruajë një Marrëveshje të re me OST, në përputhje me kushtet përkatëse.

4.1.1.8 Me hyrjen në fuqi të Rregullave të Tregut Shqiptar të Balancimit, OST sh.a. do të zhvillojë një proces parakualifikimi dhe do të bëjë të disponueshme publikisht detajet e procesit të parakualifikimit.

4.1.1.9 OST sh.a. ka të drejtën të ndërpresë testimet e Parakualifikimit në çdo kohë nëse ato rrezikojnë sigurinë e Rrjetit të Transmetimit ose të Rrjetit të Shpërndarjes. Në rast se OST sh.a. vendos të ndërpresë testin e parakualifikimit, OST sh.a. do të informojë OSHB për një datë të re për Parakualifikim, pasi siguria e sistemit të jetë stabilizuar.



4.1.1.10 OST sh.a. ka të drejtën të refuzojë Ofertat e Kapaciteteve që nuk janë në përputhje me rregullat dhe detyrimet e përcaktuara në këto Rregulla të Tregut Shqiptar të Balancimit dhe në përputhje me termat dhe kushtet e përcaktuara në Marrëveshjen e OSHB-së.

4.1.1.11 Në rast se vë re një sjellje e cila mund të cenojë Rregullat e Tregut dhe/ose konkurrencën e drejtë midis palëve, pasi është konsultuar me EREN dhe Autoritetin e Konkurrencës, OST sh.a. rezervon të drejtën të përjashtojë OSHB-në nga prokurimet e ardhshme.

4.1.2 Ofruesi i Shërbimeve të Balancimit

4.1.2.1 Ofruesi i Shërbimeve të Balancimit është pjesëmarrës tregu me njësitë ofruese të rezervës, e cila është në gjendje të ofrojë shërbime balancuese për OST-në.

4.1.2.2 Një OSHB i mundshëm (i quajtur gjithashtu kandidat për OSHB-në) duhet të paraqesë në OST sh.a. një aplikim zyrtar së bashku me informacionin e kërkuar të rezervës së mundshme balancuese që ofrojnë njësitë teknike. Brenda 8 javëve nga marrja e aplikimit, OST sh.a. do të konfirmojë nëse aplikimi është i plotë. Nëse OST-ja gjykon se aplikimi nuk është i plotë, kandidati për OSHB-në duhet të paraqesë informacionin shtesë të kërkuar, brenda 4 javëve nga marrja e kërkesës për informacion shtesë. Nëse kandidati për OSHB-në nuk jep informacionin e kërkuar brenda këtij afati, atëherë aplikimi do të konsiderohet i tërhequr. Brenda 3 muajve pas konfirmimit se aplikimi është i plotë, OST-ja do të vlerësojë informacionin e ofruar dhe do të vendosë nëse njësitë e mundshme të ofrimit të rezervës i plotësojnë kushtet për parakualifikim.¹

4.1.2.3 OST-ja do të verifikojë në parakualifikimin OSHB, kapacitetin e OSHB-së për përmbushjen e kërkesave ligjore, informatike-teknike, të komunikimit, organizative dhe financiare. Një kriter i rëndësishëm në mënyrën me vetë-dispeçerim është që OSHB-ja duhet të ketë një kontratë me një PPB me njohje të plotë dhe shpërndarja e energjisë balancuese i caktohet portofolit të një PPB-je. Kandidati OSHB duhet të kalojë një test komunikimi administrativ që përfshin të gjitha llojet e shkëmbimit të

informacionit mes OSHB dhe OST, duke përfshirë mesazhet për ofertim, për pranim, shkëmbimin e sinjaleve të standardizuara ndërmjet pajisjeve në rrjetin kompjuterik për të kontrolluar transferimin e të dhënave, për shlyerje dhe për të provuar qëndrueshmërinë e tij financiare.

4.1.2.4 OST-ja do të kontrollojë mundësinë e burimeve gjeneruese të OSHB-së nëse teorikisht OSHB-ja mundet apo jo të ofrojë kapacitetin balancues për një produkt të caktuar përgjatë gjithë periudhës kontraktuese siç është deklaruar në aplikim. OSHB-ja e parakualifikuar do të marrë emërtimin OSHB.

4.1.2.5 Kualifikimi i njësive të OSHB-së rivlerësohet:

a) në rast se kanë ndryshuar kushtet teknike apo të disponueshmërisë ose pajisjet;

b) në rast se janë modernizuar pajisjet në lidhje me aktivizimin e Rezervës së Energjisë.

Si pasojë, OSHB-ja përkatëse do të nënshkruajë me OST-në Marrëveshjen OSHB. Marrëveshja OSHB përcakton të gjithë termat dhe kushtet ndërmjet OSHB-së dhe OST-së.

4.1.2.6 Nëse vërtetohet se OSHB-ja nuk është më në pajtueshmëri me kushtet e procedurës së parakualifikimit, OST-ja do të njoftojë OSHB-në me letër rekomande. Nëse brenda 15 ditëve pune pas marrjes së njoftimit, OSHB-ja vazhdon të mbetet në papajtueshmëri me kushtet e parakualifikimit, Marrëveshja e OSHB-së përfundon. Nëse pas përfundimit të Marrëveshjes, OSHB-ja dëshiron të ofrojë shërbimin, duhet të riaplikojë nëpërmjet Procedurës së Kualifikimit dhe të nënshkruajë një Marrëveshje OSHB të re me OST-në për ofrimin e shërbimit.

4.1.2.7 Pas nënshkrimit të Marrëveshjes, OSHB-ja dhe OST-ja do të bien dakord për listën e njësive teknike që do të përdoren për të siguruar shërbimin e balancimit. Të gjitha njësitë teknike në listë duhet të kalojnë procesin e parakualifikimit të njësive teknike që vërteton kapacitetin e tyre për të përmbushur kërkesat teknike dhe organizative të përcaktuara nga OST-ja. OSHB-të e zgjedhura nuk lejohen të marrin pjesë në ankande pa përfunduar procesin e parakualifikimit të njësive teknike. Parakualifikimi i njësive përfshin:

a) përfundimin me sukses të testit të komunikimit me SCADA-në; dhe

¹ Burimi: RREGULLORE E KOMISIONIT (BE) 2017/1485 për krijimin e linjave guidë mbi operimin e sistemeve të transmetimit të energjisë



b) përfundimin me sukses të testeve të parakualifikimit (për njësitë teknike që përmbushin kërkesat teknike).

4.1.2.8 Vëllimi i parakualifikuar i Rezervës së Energjisë së njësisë teknike mund të jetë i barabartë e shumta me vëllimin maksimal që OSHB-ja mund të ofrojë në ankande. Rezultati për një parakualifikim të suksesshëm të njësisë është një licencë për njësinë e parakualifikuar.

4.1.2.9 Çdo OSHB do të informojë OST-në, sa më shpejt që të jetë e mundur, për çdo ndryshim në disponueshmërinë ekzistuese të njësisë së tij teknike, të rëndësishëm për rezultatet e parakualifikimit.

4.1.2.10 Të gjitha kostot në lidhje me parakualifikimin mbulohen nga kandidati për OSHB-në. Kjo mund të përfshijë të gjitha kostot variabël, të tilla si: lëndë djegëse, organizim etj.

4.1.2.11 OSHB-ja do t'u rinënshtrohet testeve të parakualifikimit nëse OSHB-ja:

a) parakualifikon njësitë e tij teknike për një produkt të ri të shërbimit, me kërkesa të tjera (të FCR, aFRR); ose

b) rrit volumin për të cilin është parakualifikuar.

4.1.2.12 Para se të hyjë në ankandin për kapacitet, OSHB-ja dhe OST-ja do të nënshkruajnë marrëveshjen kuadër të ankandit, i cili përcakton termat dhe kushtet specifike të ankandit mes OSHB-së dhe OST-së.

4.1.2.13 Çdo OSHB duhet t'i paraqesë OST-së ofertat e kapacitetit të tij balancues që ndikojnë në një ose më shumë PPB. Secila OSHB që merr pjesë në ankandin për kapacitet balancues duhet të paraqesë dhe do të ketë të drejtën të përditësojë ofertat e tij për kapacitet balancues përpara kohës së mbylljes së portës së procesit të prokurimit.

4.1.2.14 Pasi OSHB-ja të fitojë ankandin për kapacitet, do të marrë një kontratë për kapacitet si OSHB. Kontratat për kapacitet të OSHB do të përmbajnë vlerën specifike të kapacitetit rezervë balancues në MW, periudhën e kontraktimit, çmimin e kapacitetit, si dhe të drejtat dhe detyrimet e detajuara të OSHB-së në fjalë.

4.1.2.15 Çdo OSHB me një kontratë kapaciteti duhet të ofrojë vëllimin e kontraktuar pa kosto për aktivizimin e tij. Ata duhet gjithashtu të ofrojnë vëllime shtesë përtej detyrimit të kontratës për aktivizimin e tyre pa kosto. Çdo OSHB pa kontratë kapaciteti mund të ofrojë pa kosto aktivizimi.

4.1.2.16 OSHB-të nuk do të transferojnë detyrimet e tyre kontraktuale ndërmjet tyre, si një strategji për të shmangur pagesat e penaltiteve.

4.1.3 PPB

4.1.3.1 PPB-ja është në vetvete një pjesëmarrës tregu ose përfaqësuesi i zgjedhur prej tij që mban përgjegjësi për disbalancat e tij.

4.1.3.2 Të gjitha nominimet nga PPB-ja duhet të jenë në pozicion neto zero. Para kohës së mbylljes së portës ndërzonale të tregut brenda ditës, çdo PPB mund të ndryshojë skedulet, të nevojshme për të llogaritur pozicionin e saj. PPB-ja do të veprojë sipas nominimit për të shmangur disbalancat, që janë diferenca mes shkëmbimeve të nominuara dhe të realizuara në rrjet. Çdo PPB do të jetë financiarisht përgjegjëse për disbalancat kundrejt OST-së, sipas kostove që shkakton çdo PPB. Me miratimin e OST-së, pas njoftimit me *email* nga ana e PPB-së, veçanërisht për shkak të sigurisë së rrjetit. PPB-ja ka të drejtë të devijojë nga skedulimet e njësisë.

4.1.3.3 PPB-ja, në çdo kohë do të marrë të gjitha masat e mundshme në mënyrë që të veprojë sipas nominimit të tij ose për të ndihmuar në ruajtjen e balancës së sistemit nëpërmjet:

a) pozicionit/eve të injektimit dhe/ose të tërheqjes në Pikat e Lidhjes për të cilat PPB-ja është përgjegjëse në përputhje me Marrëveshjet e Lidhjes respektive;

b) pozicionit/eve të injektimit dhe/ose të tërheqjes në rrjetin/at e shpërndarjes, përveç rrjetit të OST-së (d.m.th. Pikat e Lidhjes për të cilat PPB-ja është përgjegjëse në përputhje me kontratat respektive që zbatohen në rrjetin/et e shpërndarjes duke marrë parasysh metodën e alokimit të përdorur nga OSSH-ja);

c) nominimin/et e tij të importit dhe eksportit; dhe

d) transfertat e tij të brendshme të nominimit/eve të energjisë të PPB-të e tjera brenda zonës së kontrollit të OST-së.

4.2 Detyrimet mbi të gjitha Palët e Lidhura

4.2.1 Detyrimi për të siguruar matje të sakta në pikën/at e caktuar/a të shkëmbimit me rrjetin ose për të pasur një marrëveshje me palën lidhëse (OST-ja ose OSSH-ja) se si këto shkëmbime përcaktohen në mënyrë alternative

4.2.1.1 Palët e Lidhura janë të detyruara të sigurojnë matje të sakta në pikën/at e caktuar/a të shkëmbimit siç përshkruhet në kapitullin VII të



Kodit të Transmetimit (neni 195, paragrafi 10), si dhe në kapitullin II të Kodit të Matjes dhe Kodit të Shpërndarjes (kapitulli 4.6.8) për përdoruesit respektivë të rrjetit të transmetimit dhe të shpërndarjes.

4.2.2 Detyrimi për të caktuar një Palë Përgjegjëse Balancuese (ose të jetë vetë PPB)

4.2.2.1 Sipas nenit 99, të ligjit nr. 43/2015 “Për sektorin e energjisë elektrike”, i ndryshuar, një Palë e Lidhur mund të mbajë vetë përgjegjësinë e balancimit ose mund ta transferojë atë tek një palë e tretë (PPB). Çdo pike lidhjeje duhet t’i caktohet një PPB, e cila mund të jetë ose vetë pala e lidhur, ose një tjetër PPB. OST-ja mund të mbështetet në Regjistrin e Lidhjes për të identifikuar nëse një Pikë e lidhjes përfaqësohet nga një PPB. Në këtë rast, OST-ja do të alokojë vlerat e matura në këto pika lidhjeje në përputhje me llogarinë e balancimit të PPB-së respektive.

4.2.2.2 PPB-ja mund të jetë çdo person tjetër fizik ose juridik që plotëson kriteret e PPB-së të përcaktuara nga OST-ja, duke përfshirë prodhuesit e energjisë elektrike, konsumatorët e mëdhenj, OSHB-të, tregtarët etj.

5. BALANCIMI I SISTEMIT

5.1 Specifikimi i masave që duhet të merren nga OST-ja në rastin e disbalancave në sistem

5.1.1 Parandalimi i veprimeve balancuese ndaj veprimeve balancuese nga OST-të e tjerë brenda të njëjtës zonë sinkrone (kompensimi i disbalancave)

5.1.1.1 OST-ja duhet të koordinojë me OST-të fqinje, në mënyrë që të zbatojë një proces të kompensimit të disbalancave me sipas nenit 145, pika 1, të SOGL dhe në përputhje me EBGL, si dhe sipas nismave të ENTSO-E. Kompensimi i disbalancave ndihmon në shmangien e aktivizimit të njëkohshëm të aFRR dhe/ose mFRR në drejtime të kundërta mes OST-ve të dy zonave të ndryshme LFC.

5.1.1.2 OST-ja do të lidhë marrëveshjet e nevojshme në përputhje me nenin 141 të Kodit të Transmetimit dhe do të implementojë proceset në përputhje me nenin 158 të tij.

5.1.2 Masat dhe rendi në të cilin duhet të zbatohen

5.1.2.1 OST-ja është përgjegjëse për dimensionimin, prokurimin, kontraktimin dhe aktivizimin e shërbimeve balancuese në mënyrë që të ruajë balancën e sistemit. Në rastin e disbalancës

së sistemit OST ka të drejtë të aktivizojë shërbimet balancuese nga OSHB-ja e kontraktuar, deri në rivendosjen e balancës në sistem. Klasifikimi i shërbimeve balancuese përshkruhet në kapitullin 6, ndërsa procesi i aktivizimit në kapitullin 10 të këtyre Rregullave të Tregut Shqiptar të Balancimit.

5.1.2.2 Pasi të jenë shteruar të gjitha ofertat, OST-ja mund të shqyrtojë anulimin e programeve të eksportit për të reduktuar disbalancën e sistemit. OST-ja duhet të hartojë dhe publikojë procedurën për këtë anulim duke marrë në konsideratë nominimet ndërkufitare të PPB-ve të përfshira.

5.1.2.3 Hapi tjetër përshkallëzues në masat balancuese është detyrimi i OSHB-ve për të ulur ose rritur rezervën për të cilën OST-ja ka dijeni që ata e disponojnë, por që nuk e kanë ofertuar për çfarëdo lloji arsye. Gjeneruesit në fjalë do të marrin automatikisht çmimin e disbalancës për kontributin e tyre, në përputhje me dispozitat e Marrëveshjes së OSHB-së.

5.1.2.4 Si masë të fundit, OST-ja mund të aplikojë shkyçjen e detyruar të ngarkesës në përputhje me dispozitat e Kodit të Transmetimit.

5.2 Përgjegjësia e balancimit

5.2.1 Përkufizime

5.2.1.1 Ashtu siç përcaktohet në nenin 17 të udhëzuesit evropianë mbi balancimin e energjisë elektrike 2017/2195 (BE), në kohë reale, çdo PPB do të përpiqet të jetë në balancë ose të ndihmojë sistemin të jetë në balancë. Për më tepër, çdo PPB duhet të jetë financiarisht përgjegjëse për disbalancat kundrejt OST-së lidhëse.

5.2.1.2 Përgjegjësia e balancimit nënkupton detyrimin ligjor mbi palët e lidhura për të dorëzuar skedulimet në lidhje me prodhimin, transmetimin dhe konsumin e energjisë elektrike, sipas kërkesave të specifikuara nga OST-ja dhe OSSH-ja dhe të veprojnë në përputhje me rrethanat. Programet duhet të përmbajnë shkëmbimet e rrjetit të nominuara në çdo pikë lidhjeje dhe/ose transaksionet me të gjitha PPB-të e tjera, të ndara sipas transaksioneve brenda një zone ofertimi dhe atyre përgjatë kufirit të një zone ofertimi.

5.2.2 Njohja si PPB

5.2.2.1 Ka dy lloje të njohjes së PPB: PPB-ja me njohje të plotë dhe PPB-ja me njohje tregtare. PPB-ja me njohje të plotë janë ato të cilat mbajnë përgjegjësinë e balancimit në pikat e lidhjes në emër të palëve të lidhura dhe të cilat janë përgjegjëse për tregtimet me PPB-të e tjera. Një palë e



përshtatshme, e cila nuk mban përgjegjësinë e balancimit për ndonjë Pikë Lidhje, gjithashtu mund të njihet si PPB me njohje të plotë.

5.2.2.2 PPB-të me njohje tregtare janë ato të cilat mbajnë vetëm përgjegjësinë e balancimit mbi transaksionet me PPB-të e tjera. Edhe pse një tregtar nuk ka një pikë lidhje, transferimi i pronësisë së energjisë fizike mund të bëhet përmes nominimit të transaksioneve të cilat do të bëhen vetëm nga një PPB.

5.2.3 Regjistri i Palëve Përgjegjëse Balancuese

5.2.3.1 OST-ja është përgjegjëse për regjistrimin e një PPB-je të caktuar në Regjistrin e PPB-së, i cili publikohet në faqen e internetit të OST-së ose kudo që konsiderohet e nevojshme nga ERE, dhe Marrëveshjes së PPB-së të nënshkruar me OST-në. Marrëveshja e PPB-së përcakton termat dhe kushtet në marrëdhëniet midis OST-së dhe PPB-ve.

5.2.3.2 Përgjegjësia e balancimit nuk do të jetë e transferueshme të OST-së ose OSSH-së në mënyrë që të shmangët konflikti i interesit me përgjegjësitë e tregut. Përjashtim bën rasti kur PPB-ja përfundon shërbimet e saj pa caktimin në kohë të një pasuesi dhe OST-ja duhet të veprojë përkohësisht si PPB-ja e mundësisë së fundit deri sa të caktohet pasuesi. Në këtë rast:

a) përgjegjësia si PPB-ja ndahet midis PPB-ve të mbetura bazuar në termat dhe kushtet ndërmjet OST-së dhe PPB-së (të cilat mund të jenë proporcionale me kapacitetin total të pikave të lidhjes për të cilat çdo PPB është përgjegjës);

b) ekzekutim i përkohshëm i PPB-së nga OST-ja (deri sa të përfundojë ndarja); OST-ja ka detyrim për informim të ERE; kostot përllogariten në përputhje me përcaktimet e Metodologjisë së Llogaritjes së Tarifave të Transmetimit të Energjisë Elektrike.

5.2.3.3 Me qëllim që të regjistrohet, si PPB-ja, PPB-ja duhet të paraqesë në OST-në një aplikim në formën dhe në përputhje me afatet e specifikuara nga OST-ja.

5.2.3.4 Aplikimi duhet të specifikojë:

- a) emrin e regjistruar të shoqërisë që aplikon;
- b) informacionin mbi kontaktin e personit përgjegjës për nënshkrimin e kontratës, për nominimin, për faturat;
- c) deklarata noteriale;

d) kapacitetin teknik të PPB-së, i cili mund të paraqitet në formën e një përmbledhje të transaksioneve kryesore të shoqërisë për blerje dhe shitje të energjisë elektrike gjatë tre viteve të fundit;

e) një listë të OST-ve dhe/ose OSSH-ve evropiane për të cilat ato ofrojnë shërbime si PPB, ose në forma të tjera të ngjashme.

5.2.3.5 Për të miratuar aplikimin, OST-ja do të verifikojë që aplikuesi ka ekspertizën e kërkuar dhe pajisjet teknike, administrative dhe organizative të kërkuara për të ekzekutuar të drejtat e tij si PPB duke përfshirë ato që kanë të bëjnë me nominimet, ofertimet dhe shlyerjen e disbalancave. Për këtë qëllim, më pas OST-ja do të testojë pajisjet për shkëmbimin korrekt të mesazheve elektronike përkatëse. Më tej, OST-ja do të nënshkruajë Marrëveshjen e PPB-së në të cilën PPB-ja angazhohet të përmbushë detyrimet e saj lidhur me:

a) kërkesat e kolateralit, që mund të përmbushen në formën e një garancie bankare, duke u plotësuar në mënyrë opsionale (sipas zgjedhjes së PPB-së) me një depozitë në OST;

b) pagesën e çdo shume të debituar si pasojë e marrëveshjes (p.sh. shumat e shlyerjes së disbalancave);

c) kushtet e përfundimit të marrëveshjes.

5.2.3.6 Në rastin e tërheqjes para kohe nga njohja si PPB:

a) OST-ja do të sigurohet që arsyet për tërheqjen e parakohshme nuk ekzistojnë më dhe nuk ka dyshim se ato do të përsëriten.

b) OST-ja do të njoftojë njohjen si PPB dhe do ta publikojë atë në faqen e saj të internetit. Njoftimi duhet të përmbajë emrin, adresën dhe vendin e regjistrimit të PPB-së dhe llojin e njohjes (të plotë ose tregtare). OST-ja do të informojë PPB-së përkatëse me *email* para publikimit.

5.2.3.7 Pas njoftimit të aplikimit të suksesshëm, OST-ja duhet të regjistrojë PPB-në në Regjistrin e PPB-ve.

5.2.3.8 Marrëveshja e PPB-së hyn në fuqi një ditë pasi është regjistruar në Regjistrin e PPB-ve. Në këtë Regjistër, OST-ja do të regjistrojë emrat, adresat, numrat e telefonit/faksit dhe llojin e njohjes së të gjitha PPB-ve të njohura si dhe të dhënat përkatëse mbi komunikimin kompjuterik.

5.2.3.9 OST-ja do të informojë PPB-në për datën e hyrjes në Regjistrin e PPB-ve. Një PPB



ka të drejtë të konsultohet me Regjistrin dhe të kërkojë korrigjimin e gabimeve në lidhje me përgjegjësinë e saj të balancimit. OST-ja informon menjëherë të gjitha PPB-të dhe OSSH-të për çdo ndryshim në Regjistrin.

5.2.3.10 Detyrimi për PPB-në me njohje të plotë është të mbajë përgjegjësinë e balancimit në pikat e lidhjes ashtu siç përmendet në Regjistrin e Lidhjes. Regjistri i Lidhjes është një listë e organizuar e të gjitha pikave fizike të lidhjes për secilin operator ku është bërë lidhja, d.m.th., OST-ja ose OSSH-ja (hartimi dhe mirëmbajtja e Regjistrit të Lidhjes është një detyrim i përbashkët i OST-së dhe OSSH-së, ndërsa secili prej tyre mban përgjegjësi individualisht për përditësimin e Regjistrit me informacion në lidhje me palët me të cilat kanë lidhur Marrëveshje Lidhje). Në këtë rast, OST-ja mund të mbështetet në Regjistrin e Lidhjes për të caktuar pikat e lidhjes për PPB-në e caktuar.

5.2.3.11 Njohja si PPB do të konsiderohet e përfunduar menjëherë, me përfundimin e Marrëveshjes së PPB-së. Në këtë rast, OST-ja do të informojë menjëherë OSSH-në dhe PPB-të e tjera dhe do të reflektojë ndryshimet në Regjistrin e PPB-ve.

5.3 Procesi i nominimeve të energjisë

5.3.1 Procesi i nominimit

5.3.1.1 Të gjitha PPB-të janë të detyruara të dërgojnë nominimin e tyre tek OST-ja para mbylljes së portës. Nominimi përfshin të gjitha tregtimet ndërzonale dhe brendazonale, si dhe shkëmbimin brenda rrjetit për çdo PSHD (periudhë e shlyerjes së disbalancave) të ditës së transaksionit.

5.3.1.2 Informacioni i detajuar i kërkuar është specifikuar nga OST-ja dhe dokumentohet në Specifikimin e Rregullave Operative.

5.3.1.3 PPB-ja duhet të ndjekë procesin e nominimit dhe mbylljen e portës përkatëse, të cilat përcaktohen nga OST-ja dhe përshkruhen në specifikimin e rregullave operative.

5.3.1.4 OST-ja duhet të kontrollojë nominimet e PPB-ve sa i përket konsistencës së tyre. Përkufizimi i konsistencës jepet në Specifikimin e Rregullave Operative. Nëse jepet konsistenca e nominimit, PPB-ja do të marrë një miratim nga OST-ja për nominimet e saj ndërzonale dhe brendazonale.

5.3.1.5 Në rast se sistemi i mesazheve elektronike me anë të kutisë qendrore të postës nuk funksionon ose PPB-ja nuk ka përkohësisht akses në sistem, një procedurë emergjence mund të lejojë PPB-të të dorëzojnë nominimet/rinominimet me anë të e-mailit, në një format sipas kërkesave që do të përcaktohen nga OST-ja.

5.4 Procesi i shkëmbimit të të dhënave të matjes

5.4.1 Lidhur me shkëmbimin e të dhënave në kohë reale midis sistemeve SCADA të PPB-së dhe OST-së, OST-ja do të përcaktojë një listë të informacionit që do të shkëmbehet. Kjo listë detajohet në Specifikimin e Rregullave Operative.

5.5 Rregullat Operative në lidhje me nominimet dhe shkëmbimin e të dhënave të matjes

5.5.1 Rregullat në lidhje me nominimet

5.5.1.1 Në orën 14:00, të ditës në avancë (D-1), PPB-ja duhet të njoftojë në OST detyrimet e tij të Rezervës së Energjisë. Në ditën D-1, PPB-ja do të vendosë dhe informojë OST-në mbi kombinimin e njësive teknike që do të sigurojnë detyrimin e rezervës së energjisë së tij.

5.5.1.2 PPB-ja do të përdorë *file-n* standard të nominimeve të paracaktuar nga OST-ja. Paraqitja e tij do të bëhet përmes platformës *online* të dedikuar që do të instalohet nga OST-ja dhe me *email* si një zgjidhje rezervë, vetëm në rastet e padisponueshmërisë së platformës.

5.5.1.3 Në rastin e ndërprerjes të detyruar, PPB-ja njofton menjëherë OST-në përmes *email*-it te personat e kontaktit të operimit në kohë reale dhe personat e kontaktit sipas marrëveshjes me PPB-në. Në këtë rast, PPB-ja paraqet nominimin e ndryshuar për periudhën brenda ditës për njësitë e saj.

5.5.1.4 Për secilin nominim në çdo drejtim, PPB-ja, gjithashtu, duhet të ofrojë, çmimet e ofertave (në €/MWh) për çdo 15 minuta, sipas specifikimeve në kapitullin 9 të këtyre rregullave.

5.5.1.5 Pasi kontrollohet vlefshmëria e nominimeve të dërguara në D-1 nga PPB-ja tek OST-ja dhe çdo korrigjimi të mundshëm, nominimet e rezervave të marra do t'i nënshtrohen kontrollit të plotë për koherencën ndërmjet kontratave të tjera të shërbimeve ndihmëse të lidhura ndërmjet OST-së dhe PPB-së dhe korrigjohen, sipas rastit. Shpeshtësia e



këtyre nominimeve është 15 minuta. Nominimet mund të përditësohen brenda ditës, së paku 45 minuta para fillimit të 15 minutave të para të përfshira në përditësim.

5.5.1.6 PPB-ja duhet të provojë aftësinë e saj për të dërguar dhe marrë të gjitha mesazhet elektronike të përcaktuara për proceset e ndryshme të punës. Kjo është pjesë e procesit të regjistrimit të PPB-ve. PPB-ja i mohohet regjistrimi (dhe kontrata e mëvonshme) nëse nuk përfundon me sukses testimin e dërgimit të mesazheve.

5.5.1.7 OST-ja dhe OSSH-ja kanë detyrimin të specifikojnë:

- a) rregullat lidhur me specifikimet e mesazhit për shkëmbimin elektronik të të dhënave;
- b) procedurat dhe specifikimet për përdorimin e një sistemi qendror për shkëmbimin e mesazheve elektronike;
- c) protokollet e komunikimit për shkëmbimin e përditshëm të informacionit;
- d) specifikimet për mesazhet e nominimit dhe të gjitha mesazhet që kanë lidhje me të.

5.5.1.8 OST-ja është **administratori ekskluziv** i sistemit qendror të mesazheve.

Kërkesat mbi përdoruesin e sistemit qendror të mesazheve duhet të jenë të certifikuar nga OST-ja për shkëmbimet elektronike të të dhënave nëpërmjet këtij sistemi.

5.5.1.9 Procedura në rast se përdoruesi shkëmben mesazhe pa certifikatën e kërkuar është:

a) OST-ja do të dërgojë një paralajmërim që tregon se mesazhi u injorua për shkak të certifikatës së gabuar, duke bërë me dije se paralajmërimi është regjistruar në OST, si dhe duke përmendur në fund rrezikun e heqjes së të drejtës pas 2 javësh, nëse përdoruesi nuk ka ridërguar një mesazh me certifikatën e saktë brenda këtyre 2 javëve;

b) paralajmërimi regjistrohet dhe ruhet në OST (mbahet si arsye për procesin e heqjes dorë nga të drejtat);

c) nëse certifikata nuk është marrë brenda 2 javësh nga paralajmërimi i dërguar nga OST-ja, efektivisht kjo do të thotë se nuk mund të paraqiten nominime dhe matje pasi do të konsiderohet si Heqje dorë nga të drejtat për përdorimin e sistemit qendror të mesazheve.

5.5.2 Rregullat në lidhje me shkëmbimin e të dhënave të matjes

5.5.2.1 Përpara orës 10:00 të ditës pasuese të punës, Pala Përgjegjëse për matjen mbledh vlerat e matjes për çdo Pikë Lidhje dhe i dorëzon vlerat paraprake tek OST-ja ose OSSH-ja ku PPB-të lidhen dhe vlerat përfundimtare të konfirmuara brenda 10 ditëve pune pas ditës së operimit.

5.5.2.2 OST-ja dhe OSSH-ja i kombinojnë këto vlera me PPB-në përgjegjëse për secilën Pikë Lidhje. OSSH-ja përcjell informacionin e matjes për çdo PPB në OST. OSSH-ja, gjithashtu, përcakton profilet standarde të ngarkesës sipas rregullores së miratuar nga ERE dhe më pas i përcjell këto profile standarde në OST.

5.5.2.3 OST-ja ka për çdo PSHD dhe për çdo PPB vlerat e matura në të gjitha Pikat e Lidhjes plus profilet standarde të ngarkesës të përgatitura nga OSSH-ja.

5.6 Çmimi i disbalancave

5.6.1 Kostot e prokurimit të kapacitetit rezervë, do të përlllogariten në përputhje me përcaktimet e Metodologjisë së Llogaritjes së Tarifave të Transmetimit të Energjisë Elektrike. Të gjitha kostot e tjera të alokuara për OST-në për të zhvilluar, operuar dhe mirëmbajtur proceset operative që lidhen me regjistrimin e PPB-së, ndryshimet, dispozitat e PPB-së të mundësisë së fundit, si dhe kosto të ngjashme përlllogariten në përputhje me përcaktimet e Metodologjisë së Llogaritjes së Tarifave të Transmetimit të Energjisë Elektrike. OST-ja do të mbajë llogari të ndara, për: i) prokurimi i kapaciteteve për shërbimet ndihmëse; ii) shërbime të tjera operative të përmendura në këtë nen; iii) si dhe llogari lidhur me kostot e disbalancave të shkaktuara nga PBB-ja, si dhe shlyerjen e PBB-së, me qellim vërtetimin e neutralitetit financiar të OST sh.a.

5.6.2 Nuk ka përjashtime as për detyrimet financiare të PPB-së dhe as për detyrimin e Palëve të Lidhura për të caktuar një PPB në Pikat e Lidhjes. Secila palë e lidhur dhe secila palë tregtare duhet të caktojë një PPB. Të gjithë PPB-të marrin në ditën pasuese (D + 1) një faturë disbalancash.

5.6.3 Çmimet e energjisë balancuese të OSHB-së paguhën me të njëjtin çmim i cili është i barabartë me çmimin e ofertës më të shtrenjtë



të pranuar (në rast të ofertës së kapacitetit) ose të aktivizuar (në rast të ofertës për energji). Si pasojë, llogaritja e çmimit të disbalancës bazohet në çmimet e energjisë balancuese të OSHB-së. Çmimi i disbalancës për mungesat është gjithmonë më i lartë ose i barabartë me çmimin më të lartë të energjisë balancuese për aktivizimin në rritje; çmimi i disbalancës për mungesat është gjithmonë më i ulët ose i barabartë me çmimin më të ulët të energjisë balancuese për aktivizimin në rënie (poshtë).

5.6.4 OST-ja do të publikojë çmimet e përkohshme të disbalancës në ditën pasardhëse të punës dhe çmimet përfundimtare të disbalancës, si dhe vëllimet përfundimtare të disbalancës neto, do të publikohen normalisht brenda 10 ditëve pune pas ditës së operimit.

5.7 Kërkesat e kolateralit të PPB-së

5.7.1 Si kusht pezullues për lidhjen e Marrëveshjes PPB, dhe jo më vonë nga nënshkrimi i vlefshëm i saj, PPB-ja do t'i japë OST-së një garanci që përputhet me kushtet për të gjithë afatin e Marrëveshjes PPB, si dhe për të gjithë kohëzgjatjen e ekzekutimit të të gjitha detyrimeve financiare që rrjedhin nga pjesëmarrja e saj në tregun e balancimit të energjisë elektrike.

5.7.2 Garancia është një siguri për ekzekutimin e kërkuar dhe të përpiktë të të gjitha detyrimeve që rrjedhin nga pjesëmarrja e PPB-së në tregun e balancimit të energjisë elektrike, duke përfshirë, por pa u kufizuar në, pagesën për disbalancat dhe/ose moskonsistencat e jashtme.

5.7.3 Garancia mund të jetë në formën e një garancie bankare me kërkesën parë të lëshuar paraprakisht nga një institucion financiar ose një pagese në të holla në OST.

5.7.4 Një PPB ka të drejtë të përdorë garanci të ndryshme gjatë kohës së vlefshmërisë së Marrëveshjes së PPB-së. Çdo garanci duhet të ketë një afat fillestar prej të paktën një viti kalendarik dhe do të rinovohet në kohë nga PPB-ja, me qëllim që të mbajë sigurinë e kërkuar për të gjithë afatin e Marrëveshjes së PPB-së dhe për të gjithë kohëzgjatjen e ekzekutimit të të gjitha detyrimeve financiare që rrjedhin nga Marrëveshja.

5.7.5 Në fund dhe/ose në përfundimin e Marrëveshjes së PPB-së për çfarëdo arsye, OST-ja do ta kthejë garancinë te PPB-ja me kusht që

PPB-ja të ketë përmbushur të gjitha detyrimet e saj që rrjedhin nga Marrëveshja.

5.7.6 Garancitë financiare ndryshojnë në varësi të llojit të PPB-së:

5.7.6.1 Për PPB-të me njohje tregtare:

a) madhësia e kolateralit për një PPB përftohet nga vëllimi në MWh i transaksionit neto më të lartë të asaj PPB-je me çdo PPB tjetër gjatë një dite kalendarike;

b) për fillimin e zbatimit të këtyre Rregullave të Tregut Shqiptar të Balancimit, madhësia e kolateralit për një PPB përftohet nga vëllimi i transaksionit neto më i lartë të pritshëm të asaj PPB-je me çdo PPB tjetër gjatë një dite kalendarike, me një minimum prej 50 MWh;

c) shuma e kolateralit të kërkuar është e barabartë me dyfishin e madhësisë së përmendur në pikën a), ose respektivisht b) e shumëzuar me çmimin mesatar të tregut të energjisë së ditës në avancë, gjatë 3 muajve përpara përcaktimit të kolateralit;

d) në rast se vëllimi i transaksionit neto më të lartë tejkalon më tepër se shumën në të cilën është bazuar kolaterali, me kërkesën e OST-së, PPB-ja do të rrisë kolateralin e saj, ku kolaterali i ri bazohet në vëllimin e transaksionit neto më të lartë gjatë një dite kalendarike, të vërejtur gjatë 6 javëve paraardhëse pa ndërprerje. Në rast se vëllimi i transaksionit neto më i lartë është thelbësisht më i ulët se shuma mbi të cilën bazohet kolaterali, me kërkesën e PPB-së, OST-ja do të lejojë një shumë kolaterali më të ulët, ku kolaterali i ri bazohet në vëllimin e transaksionit neto më të lartë gjatë një dite kalendarike, vërejtur gjatë 6 javëve paraardhëse pa ndërprerje.

5.7.6.2 Për PPB-në me njohje të plotë

a) Madhësia e kolateralit për një PPB përftohet nga:

i. vëllimi në MWh i transaksionit neto më të lartë të asaj PPB-je me çdo PPB tjetër gjatë një dite kalendarike (për herë të parë bazohet në vlerat e pritshme me një minimum prej 50 MWh);

ii. kapaciteti total i transmetimit në pikat e lidhjes për të cilat ai mban përgjegjësinë e balancimit

b) Shuma e kolateralit të kërkuar është e barabartë me dyfishin e madhësisë së përmendur në a. i), shumëzuar me çmimin mesatar të tregut të energjisë elektrike gjatë 3 muajve para



përcaktimit të kolateralit. Kjo është shuma kolaterale A.

c) Kapaciteti i transmetimit siç është përmendur në pikën “a”/ii, përcaktohet nga:

i. numri i lidhjeve në nivelin 2-10 *mm* shumëzuar me kapacitetin më të ulët që shfaqet në atë nivel;

ii. numri i lidhjeve në nivelin 11-25 *mm* shumëzuar me kapacitetin më të ulët që shfaqet në atë nivel;

iii. numri i lidhjeve në nivelin 26-50 *mm* shumëzuar me kapacitetin më të ulët që shfaqet në atë nivel;

iv. kapaciteti total i lidhjeve > 50 *mm*, ku përdoren kapacitetet individuale të lidhjes.

d) Kapaciteti total i transmetimit i përcaktuar në këtë mënyrë shumëzohet me 24, ku përfundimi, nëse është më i vogël se 50 *mm* rritet në 50 *mm*, pastaj shumëzohet me çmimin mesatar të tregut gjatë tre muajve para përcaktimit të kolateralit. Kjo është shuma kolaterale B.

e) Kolaterali që duhet t'i vendoset PPB-së përcaktohet më poshtë:

i. nëse $(2 * A) > B$, shuma e kolateralit që do t'i vendoset është $2 * A$;

ii. nëse $(2 * A) \leq B$, shuma e kolateralit që do t'i vendoset është $A + B$;

f) Për rregullimin e kërkesave për kolateral, veprohet në të njëjtën mënyrë si me PPB-në me njohje tregtare (shih paragrafin e mësipërm “d” dhe “e”).

5.8 Faturimi dhe shlyerja për PPB-në

5.8.1 Faturimi

5.8.1.1 Çdo njoftim pagese i dërguar nga OST-ja te PPB-ja do të përfaqësojë një pagesë të përkohshme, në varësi të zbritjes së një llogarie. Kjo zbritje realizohet në ditën pasuese të punës, në formën e një fature ose të një njoftimi pagese dhe ndërkohë merr parasysh korrigjimet dhe informacionet e dërguara ndërkohë në OST.

5.8.2 Fatura e disbalancave

5.8.2.1 OST-ja do të përcaktojë një llogari fillestare të disbalancave të PPB-së1 për çdo 15 minuta, në ditën pasuese të punës, pasi OST-ja të ketë mbledhur të gjitha nominimet e miratuara për tërheqje dhe injektim për çdo pikë lidhje, për transaksionet e brendshme me PPB-në të tjera dhe për transaksionet ndërzonale për çdo kufi zone.

5.8.2.2 Rregullimi lidhet me llogarinë përfundimtare dhe është i mundur vetëm pasi të dhënat e tërheqjes, injektimit, transaksionet ndër dhe brenda zonale dhe të dhënat e aktivizimit të shërbimeve ndihmëse janë përfundimtare në përputhje me proceset e zbatuara.

5.8.2.3. Fatura dërgohet me bazë ditore.

5.8.3 Afati i pagesës

5.8.3.1 PPB-ja do t'i paguajë OST-ja faturat neto pa zbritje, brenda 7 ditëve nga marrja e faturave, marrje e cila do të konsiderohet të ketë ndodhur 3 ditë pas datës në të cilën janë dërguar.

5.8.3.2 Nëse brenda 10 ditëve nga dërgimi i faturës OST-ja nuk merr pagesën e të gjitha ose disa prej shumave të mbuluara nga faturat, OST-ja do të ketë të drejtën të kërkojë interesin e pagesës së vonuar pa njoftuar. Interesi duhet të paguhet nga dita e dhjetë pas datës në të cilën është dërguar fatura, deri në datën kur ajo është paguar plotësisht. Vlera referuese për interesin është interesi bazë mesatar nga java e mëparshme e publikuar nga Banka e Shqipërisë.

5.8.3.3 OST-ja do të dërgojë një njoftim të mospagesës së PPB-së ndërmjet ditës së 11 dhe 15 pas ditës së lëshimit të faturës. Monedha e përdorur për faturimin dhe shlyerjen është euro.

5.8.3.4 OST-ja do të ketë të drejtën e tij për kompensimin e kostove ligjore në përputhje me Kodin Civil Shqiptar dhe legjislacionin në fuqi në Shqipëri, përmes të gjitha procedurave, duke përfshirë ato para gjykatës. Përcaktimet e sipërpërmendura nuk kufizojnë të drejtat e tjera të OST-së në përputhje me ligjet dhe rregulloret në fuqi si dhe dispozitat në termat dhe kushtet.

5.8.4 Kundërshtimet

5.8.4.1 Çdo kundërshtim në lidhje me faturën, në mënyrë që të jetë i pranueshëm duhet të dërgohet nga PPB-ja në formën e shkresës zyrtare para ditës së 10 nga dita e dërgimit të faturës. PPB-ja do të përshkruajë arsyet për kundërshtimin e saj në mënyrë të kuptueshme dhe në aq detaje sa është e mundur.

5.8.4.2 Kundërshtimi i faturës në asnjë mënyrë nuk e çliron PPB-ja nga detyrimi i saj për të paguar faturën.

5.8.4.3 Nëse PPB-ja ka paguar tërësisht një faturë të kontestuar në përputhje me këtë përcaktim dhe duket qartë se kundërshtimi i formuluar në përputhje me këtë përcaktim është i



justifikuar, PPB-ja ka të drejtën të kërkojë kthimin e çdo shume të paguar të kontestuar.

5.8.5 Modalitetet për mbledhjen e çdo shume të papaguar

5.8.5.1 Nëse fatura nuk paguhet nga PPB-ja brenda 7 ditëve pas marrjes së njoftimit zyrtar për mospagesë të dërguar nga OST-ja, i cili mendohet të ketë ndodhur 3 ditë pasi është dërguar [10 ditë në total siç referohet në paragrafin 1 të nenit 5.8.3], OST-ja ka të ketë të drejtën të tërheqë garancinë financiare siç përcaktohet në termat dhe kushtet kontraktuale të ankandit, pa cenuar zbatimin e dispozitave të mësipërme. Masat për mbledhjen e shumave të papaguara do të zbatohen nga OST-ja në përputhje me legjislacionin në fuqi në Shqipëri.

5.9 Procesi i ndryshimit të PPB-së

5.9.1 PPB-ja përfundon shërbimet e saj

5.9.1.1 Palët e Lidhura dhe furnizuesit e përfshirë do të informohen në kohë dhe do të kenë kohë të mjaftueshme për të gjetur një PPB alternative.

5.9.1.2 Një PPB që dëshiron të përfundojë shërbimet e saj duhet të njoftojë, të paktën 30 ditë pune para hyrjes në fuqi, të gjitha Palët e Lidhura ose furnizuesit e tyre ose të dy (në rast se lidhja është më e madhe se p.sh. 3x80A) dhe OST-ja ose OSSH-ja ku është lidhur, në lidhje me përfundimin e synuar të shërbimeve të saj. OST-ja do të informohet gjithashtu edhe në rast se lidhja është në nivelin e OSSH-së.

5.9.1.3 OST-ja do të reflektojë përfundimin e shërbimit të PPB-së në Regjistrin e PPB-ve.

5.9.1.4 Palët e Lidhura të përfshira ose Furnizuesi që përfaqëson Palët e Lidhura do të informojnë OST-në për PPB-në/të e/të cila/ët do të marrë/in përsipër përgjegjësinë nga PPB-ja që përfundon shërbimet e saj.

5.9.1.5 Në rast se nuk është përcaktuar në kohë pasuesi i PPB-së në cilindo nga Pikat e Lidhjes në fjalë:

a) përgjegjësia e balancimit në Pikat e Lidhjes të përfshira shpërndahet mbi PPB-të e mbetura me njohje të plotë sipas rregullave të specifikuara. Kjo mund të jetë mbi bazën e, p.sh., vëllimeve historike në pikat e lidhjes për të cilat ato mbajnë përgjegjësinë e balancimit;

b) nëse është e nevojshme, OST-ja merr përkohësisht rolin e PPB-së në Pikat e Lidhjes të përfshira dhe informon Palët e Lidhura në fjalë dhe ERE sipas rastit.

5.9.2 Ndryshimi i PPB-së në një pikë lidhje

5.9.2.1 Brenda 5 ditëve pune para hyrjes në fuqi, një Palë e Lidhur do të informojë OST-në ose OSSH-në ku është lidhur, lidhur me një ndryshim të PPB-së në një ose më shumë nga Pikat e tij të Lidhjes. Ky informacion duhet të shoqërohet me një deklaratë të PPB-së në fjalë ku ajo pranon këtë përgjegjësi. Nëse kjo deklaratë mungon, OST-ja ose OSSH-ja ku ato lidhen, i mohon transferimin. Përndryshe, transferimi regjistrohet në Regjistrin e Lidhjes.

5.9.3 Mundësia e fundit e balancimit

5.9.3.1 Në rast se një PPB përfundon shërbimet e saj pa përcaktimin në kohë të një pasuesi, përgjegjësia e balancimit në Pikat e Lidhjes në fjalë do të ndahet mbi PPB-të e mbetura sipas Termave dhe kushteve ndërmjet OST-së dhe OSHB-ve. Kjo ndarje mund të bazohet në numrin e total të pikave të lidhjes për çdo PPB. OST-ja do të informojë menjëherë PPB-të përkatëse duke përfshirë kohën që u jepet para se të hyjë në fuqi rialokimi.

5.9.3.2 Në kushtet e nevojës për sigurimin e shërbimit të balancimit si mundësi e fundit, OST-ja do të sigurojë këtë shërbim nga tregjet e balancimit.

6. PRODUKTET DHE PËRKUFIZIMI I TYRE

6.1 Lista e produkteve

6.1.1 Angazhimi i burimeve për të mbajtur frekuencën e rrjetit në nivelin e pranueshëm, organizohet nëpërmjet katër produkteve balancuese të paraqitura në këtë seksion. OSHB-ja është operatori i njësive teknike që ofron cilindo nga këto tre shërbime për rregullimin e frekuencës. Një përmbledhje e shkurtër e informacionit kryesor të rëndësishëm në lidhje me secilin nga produktet paraqitet në tabelën më poshtë:



Produkti	Dimensionimi	Vëllimi i kërkuar (indikativ)	Kapaciteti i kontraktuar me bazë	Periudha e kontraktimit	Çmimi i kapacitetit	Çmimi i energjisë balancuese
FCR	po	6	vjetore	1 vit	sipas ofertës	S'ka, energjia e ofruar do të shlyhet si disbalancë
aFRR	po	45	javore	1 javë	sipas ofertës	Paguar me çmimin më të ulët të ofruar (aFRR+mFRR)
mFRR	po	105	javore	1 javë	sipas ofertës	Paguar me çmimin më të ulët të ofruar (aFRR+mFRR)
Rezerva e emergjencës	jo	n/a	vjetore	1 vit	sipas ofertës	Sipas ofertës

6.2 Rezervat e mbajtjes së frekuencës (FCR)

(Rezervat primare)

6.2.1 Rezervat e Mbajtjes së Frekuencës (FCR), të njohura gjithashtu si rezervat e rregullimit primar aktivizohen në rastet e devijimit të frekuencës. FCR-ja janë rezervat operative të nevojshme për mbajtjen konstante të frekuencës nga devijimet nga vlera nominale, me qëllim ruajtjen e balancës së fuqisë së çastit në të gjithë sistemin sinkron të interkonektuar në Evropë. Qëllimi i aktivizimit të FCR-së është stabilizimi i frekuencës së sistemit sa më shpejt që të jetë e mundur në mënyrë që të shmanget rritja e disbalancave dhe dalja jashtë kontrollit e sistemit.

6.2.2 Rezervat e Mbajtjes së Frekuencës (FCR) aktivizohen në të dy drejtimet, si në rritje ashtu edhe në ulje. Përkufizimi i përgjithshëm i rregullimit në rritje dhe në ulje për të gjitha produktet balancuese është si më poshtë: Nënfrekuenca pasqyron situatën, kur injektimet janë më të ulëta se tërheqjet, në këtë mënyrë nevojitet një injektim shtesë ose tërheqje më e ulët për të balancuar sistemin. Rregullimi në ulje përdoret në rastet e mbifrekuencës. Mbifrekuenca nënkupton se injektimet janë më të mëdha se tërheqjet, kështu që nevojiten më pak injektime ose më shumë tërheqje.

6.2.3 Kapacitetet e kontraktuara të FCR-së aktivizohen automatikisht në mënyrë të vazhdueshme nga objektet e ofruesit të shërbimit të balancimit (OSHB). Kështu, njësia teknike e ofruesit të shërbimit të balancimit (OSHB) duhet të jetë e pajisur me një sistem kontrolli të frekuencës. Sistemi ka për detyrë të dedektojë automatikisht ndryshimet e frekuencës në rrjet

dhe të reagojë ndaj këtyre devijimeve duke aktivizuar operimin e FCR-së. FCR duhet të jetë plotësisht e disponueshme gjatë gjithë periudhës së kontraktuar. Për devijimin maksimal të frekuencës, njësia ofruese e FCR-së duhet që brenda 15 sekondave të aktivizojë gjysmën e kapacitetit të kontraktuar dhe kapacitetin e plotë brenda 30 sekondave. Pas arritjes së kapacitetit të plotë, FCR-ja duhet të qëndrojë e aktivizuar pa ndërprerje për të paktën 15 minuta konsektive.

6.3 Rezervat e rivendosjes së frekuencës të aktivizuara automatikisht (aFRR)

(Rezervat sekondare)

6.3.1 Qëllimi kryesor i aFRR-së është që të rivendosë balancën në zonën e kontrollit (bllokun e kontrollit LFC) në mënyrë të vazhdueshme dhe automatike, brenda kohës së rivendosjes së frekuencës. Gjithashtu njihet si rezervë sekondare. Duke vepruar kështu, aFRR në mënyrë progresive zëvendëson FCR-në e aktivizuar dhe sjell përsëri në vlerën e skeduar shkëmbimin fizik neto në kufijtë e bllokut të kontrollit LFC, bllokuar për reagim primar.

6.3.2 OST-ja dimensionon me bazë vjetore volumin e kapacitetit të aFRR-së bazuar në metodën e formulës empirike të përcaktimit të madhësisë së aFRR-së. Metodologjia për dimensionimin e aFRR-së kryesisht merr parasysh ngarkesën e parashikuar maksimale të sistemit gjatë gjithë vitit.

6.3.3 aFRR-ja aktivizohet automatikisht në drejtimin në rritje ose në drejtimin në ulje në varësi të disbalancës së sistemit (respektivisht mungesë ose tepriçë). Në rast të aktivizimit të aFRR-së, nga qendra dispeçer e OST-së transmetohet një sinjal me një tarim të përcaktuar për në qendrën dispeçer të OSHB-së,



sinjal i cili sjell rritjen ose uljen e fuqisë së injektuar. Procesi i aktivizimit duhet të garantojë aktivizimin e plotë të rezervës sipas tarimit të të dërguar nga OST-ja, brenda 7.5 minutave siç përcaktohet në kërkesat e detajuara.

6.3.4 aFRR-ja operon në qark të mbyllur, duke marrë Gabimin e Kontrollit të Rivendosjes së Frekuencës (FRCE) si të dhënë në hyrje dhe vlerën e tarimit për aktivizimin e aFRR-së si të dhënë në dalje. FRCE është i barabartë me gabimin e zonës së kontrollit (ACE) i cili përshkruan devijimin mes fuqisë reale të shkëmbyer midis zonës përkatëse LFC me zonat fqinje LFC dhe shkëmbimit ndërkufitar të skeduar për shkak të aktivizimit të kapacitetit të FRR të ndarë mes tyre. Aktivizimi i aFRR synon të çojë në reduktimin e FRCE drejt zeros.

6.3.5 Vlera e tarimit për aktivizimin e aFRR do të llogaritet nga një Rregullator i vetëm për Rivendosjen e Frekuencës, i operuar nga OST-ja brenda zonës së kontrollit LFC. Neni 145, pika 4, i Udhëzuesit Evropian për Operimin e Sistemit të Transmetimit (SOGI) përcakton kërkesat e mëposhtme për rregullatorin e rivendosjes së frekuencës. Ai duhet:

- a) të jetë një pajisje kontrolli automatike e projektuar për të reduktuar FRCE në zero;
- b) të ketë karakter proporcional-integral;
- c) të ketë një algoritëm kontrolli i cili parandalon komponenten integrale të rregullatorit që të akumulojë gabimin e kontrollit dhe mbirregullimin;
- d) të ketë funksione për modalitete operimi të jashtëzakonshme për gjendjen e alarmit dhe emergjencës.

6.3.6 aFRR-ja duhet të jetë e kontrollueshme nga LFC-ja e OST-së. Për qëllime monitorimi nga të gjitha OSHB-të duhet të vihen në dispozicion matjet në kohë reale të fuqisë.

6.3.7 OST-ja duhet të sigurojë disponueshmërinë e minimumit të kapacitetit të kërkuar balancues të aFRR-së për çdo PSHD, nëpërmjet kontratave me OSHB-të për të gjitha PSHD-të e një periudhe kontraktuese të përcaktuar. Në këtë mënyrë OSHB-të angazhohen të ofertojnë për çdo PSHD të periudhës së kontraktimit, një vëllim të ofertave për energji të aFRR-së të paktën të barabartë me sasinë e kapacitetit të kontraktuar të aFRR-së gjatë procesit të aktivizimit të saj. Palë të tjera,

gjithashtu, mund të ofertojnë kapacitetin e tyre të mbetur në dispozicion në procesin e angazhimit të shpërndarjes së energjisë balancuese të aFRR-së në bazë vullnetare, nëse zotërojnë njësi të parakualifikuara për ofrimin e aFRR-së në përputhje me kërkesat teknike të përcaktuara nga OST-ja. Ofertat për energji balancuese nga aFRR të kontraktuara nuk kanë ndonjë prioritet mbi ofertat vullnetare të energjisë balancuese të aFRR. Radha e aktivizimit të ofertës së aFRR-së përcaktohet bazuar në ofertën e çmimit të aktivizimit sipas rendit të meritës (nga më i ulëti tek më i larti).

6.3.8 OSHB-të do të paraqesin ofertat e tyre të energjisë balancuese përmes PPB-së së tyre. Energjia e aktivizuar regjistrohet në portofolin e PPB-së së tyre respektive si një transaksion energjie midis PPB-së dhe OST-së.

6.3.9 OST-ja mundet, pas një paralajmërimi të dokumentuar, të refuzojë ofertat e energjisë balancuese të aFRR-së nga një OSHB për një periudhë të pakufizuar. Kjo mund të ndodhë kur matja operationale e disponueshme tregon se kjo OSHB nuk është në gjendje të ndjekë sinjalet e kontrollit të tarimit të aFRR-së, ose kur mungon sinjali i matjeve operationale. OSHB-ja mund të krijojë një objekt rregullimi për aFRR-në duke specifikuar të njëjtin emër të objektit rregullues, për një ofertë në rritje dhe një për ofertë në rënie. Përkufizimi i një objekti rregullues parandalon aktivizimin dhe çaktivizimin e njëkohshëm të ofertës në rritje dhe ofertës në rënie e cila kufizon shpejtësinë totale të rregullimit të kërkuar.

6.4 Rezerva e rivendosjes së frekuencës e aktivizuar manualisht (mFRR)

(Rezerva terciare, koha e aktivizimit ≤ 15 min.)

6.4.1. Rezervat e mFRR-së janë rezerva fuqie të cilat aktivizohen manualisht, të cilat prodhues të caktuar të energjisë dhe/ose konsumatorët e mëdhenj industriale i vënë në dispozicion të OST-së. Detyra e mFRR-së është i njëjtë me aFRR. mFRR merr këtu një rol mbështetës për aFRR-në, në rast se ndodh një disbalancë serioze (e madhe dhe sistematike) jo e zakonshme. Aktivizimi i mFRR-së preferohet në rast se është më e lirë se aktivizimi i aFRR-së.

6.4.2 Në lidhje me kërkesat teknike, koha e aktivizimit dhe çaktivizimit të kapacitetit të plotë



të mFRR-së nuk mund të jetë më e gjatë se 15 minuta. Ka dy tipa të mFRR-së:

a) rezervë prodhimi, d.m.th. injektimi i fuqisë shtesë në rrjet;

b) reduktim konsumi, d.m.th., reduktimi i sasisë së energjisë së tërhequr nga rrjeti nga ana e përdoruesit.

6.4.3 Një OSHB që nënshkruan me OST-në një kontratë angazhimi për disponueshmerinë e mFRR-së për rezervat e prodhimit, merr përsipër:

a) t'i sigurojë OST-së gjatë gjithë periudhës së kontraktimit, angazhimin për shpërndarjen e mFRR sipas ofertës, të paktën të barabartë me sasinë e kontraktuar;

b) ta shpërndajë produktin në përputhje me kërkesat teknike të tij brenda parametrave të ofertës për të cilën është angazhuar, sipas kërkesës së OST-së për aktivizim. mFRR-ja duhet të ofrohet plotësisht brenda 15 minutave pasi OST-ja e ka kërkuar atë.

c) OST-ja mund të kërkojë vetëm aktivizimin e rezervave për të cilat është dhënë një ofertë dhe për atë kohë sa është e nevojshme.

6.4.4 Aktivizimi nga OST-ja do të konfirmohet nga prodhuesi duke përdorur një ndërfaqe të instaluar në OST dhe në ambientet e prodhuesit.

6.5 Rezerva zëvendësuese (RR)

(Rezerva terciare, koha e aktivizimit > 15 min.)

6.5.1 Rezervat zëvendësuese (RR) janë rezerva të fuqisë aktive të disponueshme për të zëvendësuar njësitë generuese që pësojnë një ndërprerje të detyruar ose që përdoren për qëllime të menaxhimit të kongestionit. Në sistemet me vetëdispeçerim, RR duhet të aktivizohet ekskluzivisht nga tregu për të rikuperuar daljet jashtë pune të njësive generuese. Në përgjithësi kjo kërkon që mbyllja e portave të tregut brenda ditës (ID) të jetë sa më afër të jetë e mundur me operimin kohë reale. Në këtë kuptim, RR-ja me kohë të aktivizimit më të gjatë se mbyllja e portës së tregut brenda ditës nuk duhet të përdoret nga OST-ja për balancimin e sistemit. Kjo mbetet përgjegjësi e tregut.

6.5.2 Shkaku për aktivizimin e RR-së nga OST-ja duhet në këtë mënyrë të kufizohet në situatat e kongestionit që kërkojnë menaxhim efikas dhe proaktiv, në çdo kohë duke filluar nga

mbyllja fillestare e portës së ofertave në D-1 deri në mbylljen finale të portës së ofertave. Aktivizimi i RR-së bëhet manualisht njëlloj si mFRR-ja dhe sipas përkufizimit, koha e aktivizimit të RR-së është më shumë se 15 minuta.

6.5.3 RR duhet të ofertohet plotësisht në fillim të periudhës së shlyerjes së disbalancës kur OST-ja e kërkon ose pas kërkesës së OST-së brenda kohës së plotë të aktivizimit (siç specifikohet në ofertë), cilado kërkesë është bërë e fundit.

6.6 Rezervat e emergjencës (ER)

6.6.1 Rezervat e emergjencës (ER) janë një lloj i veçantë i mFRR të kontraktuara me anë të menaxhimit të kërkesës. Rezervat e emergjencës do të merren parasysh në rast se nuk mund të kontraktohet volumi i mjaftueshëm i mFRR-së nga asetet e gjenerimit, për të mbuluar kërkesat e dimensionimit dhe/ose si një mbështetje për tregun që ka dështuar të aktivizimin në kohë të rezervave zëvendësuese për ndërprerjet. Rezerva e emergjencës do të mbahet e ndarë nga aFRR-ja dhe mFRR-të e tjera dhe do të shfrytëzohen si një lloj i “rezervës së mundësisë së fundit”.

6.6.2 ER mund të kontraktohet në bazë vjetore. Kontrata për ER-në do të përfshijë detyrimet e kapacitetit, çmimin e kapacitetit dhe çmimin e aktivizimit. Ngjashëm me FCR-në, nuk ka ankand për angazhimin për shpërndarje. Pas kontraktimit vjetor, njësitë e rezervës së emergjencës kanë mundësinë të paraqesin edhe një herë një ofertë në ankandin e kapacitetit, përndryshe ata deklarojnë padisponueshmërinë.

6.6.3 ER-ja nuk i nënshtrohen kërkesave të dimensionimit, por ato janë një zëvendësim për mFRR-në dhe për këtë arsye sasia e kontraktuar do të zvogëlojë sasinë e mFRR-së për t'u kontraktuar.

7. PARAKUALIFIKIMI

7.1 Para hyrjes në tregun balancues, OSHB-ja duhet të regjistrohet dhe të marrë certifikatën e parakualifikimit të njësive specifike duke synuar tregtimin e produkteve të veçanta të shërbimit të balancimit. Për më tepër, OSHB-ja duhet të caktojë një PPB, i cili është përgjegjës për të mbajtur të balancuar portofolin e tij të balancimit.

7.2 Si parakusht për të hyrë në ankand, OSHB-ja duhet të provojë në parakualifikim

aftësinë e njërive të tij teknike për të furnizuar shërbimet balancuese në përputhje me të gjitha kërkesat organizative, komunikuese dhe teknike të përcaktuara dhe të verifikuara nga OST-ja. Procesi i parakualifikimit, kërkesat teknike të detajuara dhe testimi për çdo produkt shërbimi balancues duhet të përcaktohen nga OST-ja dhe të dokumentohen në Specifikimin e Rregullave Operative. OST-ja duhet të publikojë të gjithë informacionin në lidhje me parakualifikimin.

7.3 Rezultati i parakualifikimit përcakton nëse njësitë mund të furnizojnë llojin dhe sasinë maksimale të kapacitetit që njësi mund të ofrojë për këtë produkt specifik. OSHB-ja duhet të provojë jo vetëm aftësinë e njërive teknike të saj për të garantuar disponueshmërinë e deklaruar përgjatë gjithë periudhës kontraktuese, por, gjithashtu, aftësinë për të dhënë përgjigjen e kërkuar kur këto njësi teknike janë aktivizuar nga OST-ja për furnizimin e shërbimeve balancuese.

8. PROCESI I ANGZHIMIT MBI DISPONUESHMËRINË DHE SHPËRNDARJEN

8.1 OST-ja është përgjegjëse për prokurimin e kapacitetit balancues në ankandet e angazhimit për disponueshmërinë dhe të mundësisë për aktivizimin dhe livrimin e energjisë balancuese të siguruar në ankandin e angazhimit.

8.2 OST-ja si blerës i vetëm, duhet të zhvillojë procese të standardizuara për prokurimin e shërbimit të balancimit. Këto procese do të specifikohen nga OST-ja dhe do të dokumentohen në Specifikimin e Rregullave Operative. Përshkrimi i procesit të prokurimit përfshin listën e aktiviteteve që duhet të kryhen nga OST-ja dhe OSHB-ja, si dhe specifikimi i çdo aktiviteti dhe kohën e të gjitha aktiviteteve. Të gjithë këto informacione gjithashtu specifikohen në Specifikimin e Rregullave Operative.

8.3 OST-ja duhet të publikojë në faqen e saj të internetit informacionin në lidhje me procesin e prokurimit dhe rezultatet e secilit ankand.

9. PROCESI I AKTIVIZIMIT

9.1 FCR-ja

9.1.1 FCR-ja aktivizohet vazhdimisht duke reaguar ndaj devijimeve të vrojtuar të frekuencës së matur me frekuencën nominale. Niveli standard i frekuencës është 50Hz, por frekuenca mundet të devijojë pak nga kjo vlerë

për të korrigjuar devijimet e agreguara të frekuencës gjatë kohës (*frequency time deviation*). OST-ja duhet të informojë OSHB-të ofrues të FCR-së për çdo ndryshim të frekuencës së synuar, në mënyrë që ata të mund të tarojnë kontrollorët e tyre primarë, sipas rastit.

9.1.2 Pas reagimit fillestar, i cili është një veprim i përbashkët i të gjithë ofruesve të FCR-së në të gjithë sistemin sinkron, frekuenca duhet të kthehet në vlerën nominale.

9.2 aFRR-ja

9.2.1 Si një hap tjetër në kontrollin e frekuencës, blloku i kontrollit LFC që shkakton devijimin e frekuencës duhet të rivendosë pozicionin e tij neto (= shuma e flukseve në import minus flukset në eksport, të korrigjuara për rregullimin primar) në pozicionin neto të skedulluar (= shuma importeve të skeduluara minus shumën e eksporteve të skeduluara). Balancimi ndërmjet këtyre dy vlerave është balanca e sistemit. Kjo balancë duhet të rivendoset brenda kohës për Rivendosjen e Frekuencës, e cila në sistemin sinkron të Evropës Kontinentale është përcaktuar 15 minuta. Kjo mund të arrihet vetëm nëpërmjet një procesi të koordinuar dhe centralizuar nga OST-ja: me anë të aktivizimit automatik të aFRR-së nëpërmjet sistemit LFC në kombinim me aktivizimin manual të mFRR-së me anë të mesazheve elektronike.

9.2.2 OST-ja do të përpiqet të minimizojë kostot totale të aktivizimit të rezervave, për të rivendosur balancën e sistemit. Prandaj duhet të marrë vendimet e mëposhtme:

a) sa nga ofertat e ofruara për FRR-në do të përdoren për aktivizimin automatik të LFC-së?

b) në çfarë kushtesh duhet rritur aFRR-ja në LFC ose kur duhet aktivizuar mFRR-ja në vend të saj?

Procedura konkrete përcaktohet si më poshtë:

a) **procesi i nominimit**, duke dhënë për përzgjedhje dhe aktivizim ofertat e aFRR të vendosura si më të lirë, të paktën deri në vëllimin e kërkuar të LFC-së. Ky nominim bëhet për çdo PSHD menjëherë pas mbylljes së portës për ofertim. OSHB-të e përfshira informohen se ofertat e tyre janë nominuar për rregullimin LFC. Në rast se do të përzgjidhen dhe aktivizohen të gjitha ofertat e nominuara/pranuara, dhe pritët që disbalanca do të vazhdojë, ka dy mundësi nga



të cilat operatori duhet të zgjedhë më optimalen, duke marrë parasysh vëllimin e aktivizuar, kohëzgjatjen e pritshme të disbalancës, cilësinë e kërkuar të kontrollit të balancës dhe kostot respektive:

i. nominohen dhe shtohen në LFC më shumë oferta për aFRR-në; ose

ii. aktivizohen ofertat e mFRR-së (me çmim oferte sipas *rendit të meritës*), me qëllim që të zëvendësohet aFRR e aktivizuar

Parimisht, nëse ofertat e mFRR-së janë më të lira dhe ekziston mundësia që kjo disbalancë të vazhdojë për PSHD-në aktuale dhe atë në vijim, mundësia (ii) do të preferohet krahasuar me mundësinë (i);

b) **procesi i përzgjedhjes**, ky është një algoritëm automatik brenda LFC-së që përzgjedh nga ofertat e nominuara, aq oferta sa nevojiten me çmimin sipas *rendit të meritës* për t'u aktivizuar në paralel me qëllim që të arrihet përgjigja e kërkuar. Ky proces operon në dy drejtime: përzgjidhen më shumë oferta nëse nevojitet më shumë reagim, përzgjidhen më pak oferta nëse nevojitet më pak reagim.

c) **procesi i aktivizimit**:

i. të gjitha ofertat e përzgjedhura aktivizohen paralelisht (*pro-rata*);

ii. ofertat që aktivizohen nga LFC në një PSHD, por nuk janë më të disponueshme ose janë përzgjedhur për PSHD-në pasardhëse, vendosen në zero duke respektuar shpejtësinë e rregullimit që ishte specifikuar. Megjithatë kjo krijon energji balancuese të aktivizuar për atë ofertë në PSHD-në pasuese, oferta të tilla nuk do të ndikojnë në çmimin e aktivizimit në PSHD-në pasardhëse.

iii. kërkesa për sasinë e energjisë së aFRR-së monitorohet vazhdimisht nga LFC-ja kombëtare për çdo cikël të LFC-së dhe ky informacion regjistrohet për çdo ofertë dhe për çdo 5 min për qëllime të shlyerjes. Çdo OSHB (ose PPB-ja e tij), gjithashtu, pritet të regjistrojë energjinë e aktivizuar nga OST-ja me qëllim lehtësimin e kontrollit në informacionin e shkëmbyer.

9.2.3 Një sasi standarde e aFRR-së së ofruar nominohet me çmim sipas *rendit të meritës*, të barabartë me kërkesat e dimensionimit, për secilën PSHD. Kjo është e mjaftueshme për të rregulluar gabimet në disbalancë.

9.2.4 Përveç kësaj, mund të nominohen gjithashtu ofertat për aFRR-në deri në 100% të vëllimit kërkesës së dimensionuar për mFRR-në, deri sa ofertat e nominuara të aFRR-së bëhen më të shtrenjta se oferta më e lirë e mFRR-së.

9.2.5 Kriteri i përzgjedhjes për përzgjedhjen e ofertave nga LFC-ja është shpejtësia e disponueshme (*ramp*) e rregullimit nga ofertat e përzgjedhura kundrejt shpejtësisë së kërkuar të rregullimit siç kërkohet nga LFC-ja. Nëse kjo është më e lartë, ofertat përzgjidhen në drejtim të kundërt sipas rendit të meritës së çmimit. Nëse kjo është më e ulët, ofertat përzgjidhen sipas rendit të meritës së çmimit.

9.2.6 Kur gjatë një periudhe të caktuar kohore janë aktivizuar ofertat në LFC që janë më të shtrenjta se oferta tjetër e disponueshme në rangun e ofertës së mFRR-së, nëse operatori i sistemit gjykon që rreziku i mbi aktivizimit është minimal, aktivizohet oferta e mFRR-së.

Shihni specifikimet e procesit të nominimit në Specifikimin e Rregullave Operative.

9.3 mFRR/RR me kohë aktivizimi ≤ 30 min.

9.3.1 Ofertat e mFRR-së përdoren për disbalanca të mëdha dhe/ose që pritet të zgjatin në kohë. Fillimisht OST-ja zbulon humbjen në shkallë të gjerë të prodhimit ose ngarkesës nga gradienti i rritjes së disbalancës e krahasueshme me madhësinë e ndërprerjes. OST-ja, gjithashtu, mund të marrë informacion nga pjesëmarrësi përkatës i tregut mbi një vlerësim të shkallës në të cilën dhe kohën në të cilën, pasojat e ndërprerjes priten të eliminohen nga vete pjesëmarrësi i tregut. Paralelisht, disbalanca do të zvogëlohet automatikisht nga LFC-ja me anë të aFRR-së në dispozicion. Nëse aFRR-ja e mbetur në dispozicion bie poshtë një pragu të caktuar dhe pritshmëria është që incidenti të vazhdojë më gjatë se sa disa PSHD, atëherë mFRR-ja do të aktivizohet manualisht nga OST-ja derisa aFRR-ja e mjaftueshme të vihet në dispozicion për shkak të veprimeve korrigjuese të pjesëmarrësve të tregut. Gjithashtu çmimi i aktivizimit mund të jetë një arsye për të aktivizuar mFRR-në kur është më i lirë se sa aktivizimi i aFRR-së më gjatë. Ofertat e mFRR-së aktivizohen për një periudhë minimale të një PSHD-je të plotë dhe gjithmonë në madhësinë e plotë të ofertës.



9.4 Rezervat e emergjencës

9.4.1 Në rast të rezervave të emergjencës së kontraktuara, ato do të aktivizohen vetëm pas paraqitjes së një mesazhi urgjent të tregut se ekziston një rrezik në rritje i aktivizimit të rezervave të emergjencës, përveç rasteve kur sigurohen më shumë oferta të mFRR-së në rritje. Ky mesazh mundet tashmë të transmetohet në ditën paraardhëse, pas mbylljes së portës të ditës paraardhëse për ofertimin e rezervave nëse ofertat e aFRR-së dhe mFRR-së në dispozicion nuk janë të mjaftueshme për të mbuluar kërkesat e dimensionimit.

9.5 Rezerva zëvendësuese me kohë aktivizimi > 30 min.

9.5.1 Çdo ofertë për rezerva të aktivizuara manualisht me kohë aktivizimi më të madhe se 30 minuta do të kategorizohet si “oferta për qëllime të tjera”. OST-ja do të aktivizojë këto oferta vetëm për rastet e kongestionit dhe menaxhimit të sigurisë të rrjetit. Kjo kërkon që këto oferta të kenë gjithashtu një gjeotag (vendndodhja e paraqitur elektronikisht).

9.5.2 Nëse këto oferta janë aktivizuar, ata do të marrin për kompensimin e kostove të aktivizimit, çmimin më të lartë të ofertës dhe çmimin e energjisë balancuese, por nuk duhet të vendosin çmimin e energjisë balancuese. Kështu ata do të cilësohen si të aktivizuara për qëllime të tjera. Çdo ofertë e aktivizuar në drejtim të kundërt për të mbajtur balancën nuk do të cilësohet dhe mund të shlyhet si çdo ofertë tjetër balancuese (paguar me çmimin më të ulët të ofruar).

10. FATURIMI DHE SHLYERJA PËR OSHB-në

10.1 Për çdo vëllim të angazhimit mbi disponueshmërinë të dhënë, OSHB-ja do të marrë një konfirmim të kërkesë/ofertës duke deklaruar numrin e kërkesë/ofertës së blerjes dhe kompensimet për Kapacitetin Rezervë të kontraktuar (rezervimi).

10.2 Përmes një platforme të përbashkët ose mjeti tjetër të miratuar, OST-ja do t'i ofrojë OSHB-në pas çdo dite pasuese të punës pas ditës së operimit, një raport lidhur me të dhënat dhe monitorimin e disponueshmërisë së kapacitetit balancues dhe shpërndarjen e energjisë balancuese në ditën e mëparshme. Një raport javor përbëhet nga dy pjesë. Pjesa e parë

përmban shumën e të gjitha kompensimeve për kapacitetet e kontraktuara dhe energjitë e aktivizuara. Pjesa e dytë përmban të gjitha reduktimet e kompensimeve të llogaritura nga OST, duke treguar gjithashtu metodën e llogaritjes dhe të gjitha të dhënat mbi të cilat bazohet llogaritja.

10.3 Nëse më pas duket se llogaritja e reduktimit të kompensimit është/janë e/të pasaktë, pala e parë do të informojë palën tjetër për të ndërmarrë veprime sa më shpejt që të jetë e mundur. Palët do të përpiqen pastaj të arrijnë një zgjidhje miqësore. Në mungesë të saj, do të zbatohet procedura e paracaktuar për zgjidhjen e mosmarrëveshjeve e përcaktuar në seksionin 3.3.4.

10.4 Brenda tri ditëve pune pas përfundimit të një jave (që përfundon të dielën), OSHB mbledh vlerat nga raportet ditore dhe dërgon në departamentin e shlyerjes të OST-së faturën *pro-forma* javore të tij për kapacitetin balancues të kontraktuar dhe energjinë balancuese të shpërndarë.

10.5 Brenda 5 ditëve pune pas marrjes së faturës *pro-forma*, OST-ja do të pranojë ose refuzojë atë. Në përputhje me faturën *pro-forma*, fatura mund të dërgohet në Departamentin e Faturimit dhe Pagesave vetëm pasi OST-ja të ketë aprovuar faturën *pro-forma*.

11. MENAXHIMI I KONGJESTIONEVE TË BRENDSHME

11.1 OST-ja do të ketë detyrimin që të përdorë ofertat me kohë aktivizimi më të gjatë se 30 minuta, ekskluzivisht për menaxhimin e kongestionit.

11.2 OST-ja do të ketë të drejtën të kufizojë lirinë e transaksioneve të Palëve të Lidhura (ose PPB-të e tyre) në rast të mundësisë për përsëritje të kongestionit (p.sh. refuzohet ndryshimi i nominimeve që përfshijnë pikat e lidhjes në zonën me kongestion në një drejtim që rrit kongestionin). OST-ja duhet të informojë PPB-të e Palëve të Lidhura respektive sipas rastit.

11.3 Procedurat operative për menaxhimin e kongjestionëve të brendshme do të kryhen si më poshtë:

a) OST-ja ose OSSH-ja duhet të deklarojnë zonën e kongestionit (një zonë kongjestionit që do të përcaktohet, p.sh., nga grupi i kodeve EIC të pikave të lidhjes respektive). Ndryshimet e



nominimeve që përfshijnë pikat e lidhjes në zonën me kongjestion në drejtimin që rrit kongjestionin do të refuzohen. Nuk lejohen më tej transaksionet jashtë zonës nëse janë arritur limitet e eksportit të zonës dhe nuk lejohen më tej transaksionet brenda zonës nëse janë arritur limitet e importit të zonës. Prandaj OST-ja do të refuzojë nominimet e transaksioneve të tilla.

b) OSHB-të brenda një zone të deklaruar kongjestionin janë të detyruara të ofrojnë tek OST-ja rezerva në rritje ose rënie për menaxhimin e kongjestionit të brendshëm. OST-ja mund të caktojë nivelin e pragut të kapaciteteve të njësisë teknike që bien nën këtë detyrim, p.sh. ta ulin nëse nuk janë marrë oferta të mjaftueshme.

c) OST-ja do të aktivizojë oferta energjie kundërbalancuese jashtë zonës me kongjestion në rastin e aktivizimit të ofertave brenda zonës me kongjestion, për të menaxhuar kongjestionin e brendshëm.

11.4 Për shlyerjen e disbalancave në një zonë të deklaruar me kongjestion, OST-ja mund të përcaktojë një regjim të ndryshëm të shlyerjes që parandalon nxitjen e stimuljeve të keq-qëllimshëm në mosdhënien e ofertave të aktivizuara në zonën me kongjestion, për të lehtësuar kongjestionin. OST-ja duhet të publikojë rregullat e një regjimi të tillë si pjesë e Specifikimit të Rregullave Operative të balancimit.

12. ANEKSET

12.1 Modeli i Marrëveshjes së OSHB-së (në një dokument të veçantë)

12.2 Modeli i Marrëveshjes së PPB-së (në një dokument të veçantë)

12.3 Përcaktimi i çmimeve të disbalancave

1. Përkufizime

1.1 Rregullimi në rritje

1.2 Rregullimi në ulje

1.3 Çmimi për energjinë balancuese në rritje

1.4 Çmimi për energjinë balancuese në ulje

1.5 Komponentja nxitëse

1.6 Gjendja e rregullimit (e sistemit)

1.7 Delta e balancës: autorizimi për disbalancat e sistemit për t'u publikuar në kohë reale nga OST-ja (*open loop ACE*)

1.8 Çmimi mesatar: përkufizimi i çmimit të energjisë balancuese në rastin pa rregullim

2. Specifikimi i gjendjeve të rregullimit (për secilën PSHD)

2.1 Gjendja e rregullimit = 0 nuk kërkohet as rregullim në rritje dhe as në ulje

2.2 Gjendja e rregullimit = +1: kërkohet vetëm rregullim në rritje

2.3 Gjendja e rregullimit = -1: kërkohet vetëm rregullim në ulje

2.4 Gjendja e rregullimit = +1: kërkohet edhe rregullim në rritje edhe rregullim në ulje, por delta e balancës ka qenë jozbritëse në mënyrë të vijueshme

2.5 Gjendja e rregullimit = -1: kërkohet edhe rregullim në rritje edhe rregullim në ulje, por delta e balancës ka qenë jorritëse në mënyrë të vijueshme

2.6 Gjendja e rregullimit = 2: kërkohet edhe rregullim në rritje edhe rregullim në ulje, por delta e balancës nuk ka qenë jorritëse në mënyrë të vijueshme as jozbritëse në mënyrë të vijueshme.

2.7 Gjendja e rregullimit = 2: kërkohet edhe rregullim në rritje edhe rregullim në ulje, por delta e balancës ka qenë jorritëse në mënyrë të vijueshme dhe jozbritëse në mënyrë të vijueshme.

3. Specifikimi i çmimeve të disbalancës

3.1 Çmimi i disbalancës në rast se gjendja e rregullimit = -1 (tepricë në sistem)

a) Nëse disbalanca e PPB-së ka të bëjë me tërheqjen nga rrjeti (PPB-ja ka mungesë), çmimi i disbalancës është i barabartë me çmimin e energjisë balancuese në ulje plus komponenten nxitëse. Në këtë rast PPB-ja paguan OST-në.

b) Nëse disbalanca e PPB-së ka të bëjë me injektimin në rrjet (PPB-ja ka tepriçë), çmimi i disbalancës është i barabartë me çmimin e energjisë balancuese në ulje minus komponenten nxitëse. Në këtë rast OST-ja paguan PPB-në.

3.2 Çmimi i disbalancës në rast se gjendja e rregullimit = +1 (sistemi ka mungesë)

a) Nëse disbalanca e PPB-së ka të bëjë me tërheqjen nga rrjeti (PPB-ja ka mungesë), çmimi i disbalancës është i barabartë me çmimin e energjisë balancuese në rritje plus komponenten nxitëse. Në këtë rast PPB-ja paguan OST-në.

b) Nëse disbalanca e PPB-së ka të bëjë me injektimin në rrjet (PPB-ja ka tepriçë), çmimi i disbalancës është i barabartë me çmimin e energjisë



balancuese në rritje minus komponenten nxitëse. Në këtë rast OST-ja paguan PPB-në.

3.3 Çmimi i disbalancës në rast se gjendja e rregullimit = 2 (disbalancë e dyanshme e sistemit)

a) Nëse disbalanca e PPB-së ka të bëjë me tërheqjen nga rrjeti (PPB-ja ka mungesë), dhe çmimi mesatar është më i lartë se sa çmimi për energjinë balancuese në rritje, çmimi i disbalancës është i barabartë me çmimin mesatar plus komponenten nxitëse. Në këtë rast PPB-ja paguan OST-në.

b) Nëse disbalanca e PPB-së ka të bëjë me injektimin në rrjet (PPB-ja ka tepricë) dhe çmimi mesatar është më i ulët sesa çmimi për energjinë balancuese në rënie, çmimi i disbalancës është i barabartë me çmimin mesatar minus komponenten nxitëse. Në këtë rast OST-ja paguan PPB-në.

c) Nëse disbalanca e PPB-së ka të bëjë me tërheqjen nga rrjeti (PPB-ja ka mungesë) dhe çmimi mesatar nuk është më i lartë se sa çmimi për energjinë balancuese në rritje, çmimi i disbalancës është i barabartë çmimin për energjinë balancuese në rritje plus komponenten nxitëse. Në këtë rast PPB-ja paguan OST-në.

d) Nëse disbalanca e PPB-së ka të bëjë me injektimin në rrjet (PPB-ja ka tepricë) dhe çmimi mesatar nuk është më i ulët se sa çmimi për energjinë balancuese në ulje, çmimi i disbalancës është i barabartë çmimin për energjinë balancuese në ulje minus komponenten nxitëse. Në këtë rast OST-ja paguan PPB-në.

3.4 Çmimi i disbalancës në rast se gjendja e rregullimit = 0 (pa rregullim)

a) Nëse disbalanca e PPB-së ka të bëjë me tërheqjen nga rrjeti (PPB-ja ka mungesë), çmimi i disbalancës është i barabartë me çmimin mesatar plus komponenten nxitëse. Në këtë rast PPB-ja paguan OST-në.

b) Nëse disbalanca e PPB-së ka të bëjë me injektimin në rrjet (PPB-ja ka tepricë), çmimi i disbalancës është i barabartë me çmimin mesatar minus komponenten nxitëse. Në këtë rast OST-ja paguan PPB-në.

3.5 Komponentja nxitëse

a) Vlera fillestare: €0/MWh

b) Rregullimet e komponentes nxitëse

3.5.b.1 Do të rregullojë komponentën nxitëse në bazë të kriterëve objektive sipas një procedure të përcaktuar dhe të publikuar nga OST-ja në faqen zyrtare.

3.5.b.2 Vlera aktuale e komponentes nxitëse do të publikohet në faqen zyrtare të OST-aë.

3.5.b.3 ERE ka të drejtën në çdo kohë të shqyrtojë procedurën për rregullimin e komponentes nxitëse dhe nëse është e nevojshme i kërkon OST-së ta dërgojë këtë procedurë për t'u miratuar në ERE dhe ta përfshijë si pjesë e Rregullatve të Tregut Shqiptar të Balancimit.

3.6 Neutraliteti i kostove të OST-së në balancim

a) OST-ja do të përllogarisë kostot në përputhje me përcaktimet e Metodologjisë së Llogaritjes së Tarifave të Transmetimit të Energjisë Elektrike lidhur me rezultatet neto të shlyerjeve, të:

3.6.a.1 Disbalancat me PPB-të

3.6.a.2 Kostot e kontraktimit dhe aktivizimit të rezervave balancuese

3.6.a.3 Proceset e balancimit ndërkufitar duke përfshirë programet e kompesimit për shkëmbimet e paqëllimshme

3.7 Kompensimi për pagesën e komponentes nxitëse

a) Në rast se disbalanca e PPB-së shkaktohet nga një ngjarje në rrjet ose nga ndërhyrja e OST-aë ose OSSH-së, PPB-së merr kompensim për pagesat në lidhje me komponenten nxitëse. Shembuj të këtyre ngjarjeve janë (joshteruese):

3.7.a.1 Shkarkimi automatik ose manual i ngarkesës nga OST-ja ose OSSH-ja

3.7.a.2 Rritja ose ulja e detyruar e shkëmbimit në rrjet nga OST-ja ose OSSH-ja

b) Kompensimi do të paguhet nga operatori i rrjetit në rrjetin e të cilit ka ndodhur ngjarja.

VENDIM

Nr. 107, datë 2.7.2020

MBI KËRKESËN E SHOQËRISË “MTC ENERGY” SHPK, PËR TRANSFERIMIN E ASETEVE TË SAJ TË BARRËSUARA NGA “RAIFFEISEN BANK” SHA TEK “ALPHA BANK” SHA

Në mbështetje të nenit 16 dhe nenit 44, pika 1, të ligjit nr. 43/2015 “Për sektorin e energjisë elektrike”, i ndryshuar, pika 1.3 e “Licencës për prodhimin e energjisë elektrike”, si dhe në zbatim të nenit 6; nenit 7 dhe nenit 8 të “Rregullores për procedurat e transferimit të aseteve nga të licencuarit”, të miratuar me vendimin e Bordit të ERE-s nr. 119, datë



21.7.2016, gjithashtu, dhe nenit 19, pika 1, germa “a”, të “Rregullores për organizimin, funksionimin dhe procedurat e ERE-s”, miratuar me vendimin nr. 96, datë 17.6.2016; Bordi i Entit Rregullator të Energjisë (ERE), në mbledhjen e tij të datës 2.7.2020, mbasi shqyrtoi relacionin me nr. 75/3 prot., datë 17.6.2020, dhe relacionin shtesë nr. 75/3-1 prot., datë 30.6.2020, të përgatitur nga Drejtoria e Licencimit, Autorizimeve dhe Mbikëqyrjes, në lidhje me kërkesën e shoqërisë “MTC Energy” sh.p.k., për transferimin e aseteve të saj nga “Raiffeisen Bank” sh.a. tek “Alpha Bank” sh.a.,

konstatoi se:

- Me shkresën e protokolluar në ERE me nr. 679 prot., datë 5.5.2020, shoqëria “MTC Energy” sh.p.k., ka depozituar kërkesën për miratimin e transferimit të barrësimit të aseteve të saj nga “Raiffeisen Bank” sh.a. tek “Alpha Bank” sh.a.

- Shoqëria “MTC Energy” sh.p.k. është mbajtëse e licencës nr. 227, seria PV14K, për prodhimin e energjisë elektrike, për një periudhë 30-vjeçare, miratuar me vendimin e Bordit të Komisionerëve të ERE-s nr. 20, datë 21.3.2014.

- Nga analiza e dokumentacionit të depozituar nga shoqëria, bashkëlidhur kërkesës së sipërcituar, kjo në zbatim të nenit 7 të “Rregullores së procedurave të transferimit të aseteve nga të licencuarit”, miratuar me vendimin nr. 119, datë 21.7.2016, të Bordit të Entit Rregullator të Energjisë (ERE), rezulton si më poshtë:

- neni 7, pika 1, germa “a” (ekstrakt historik të shoqërisë tregtare të të licencuarit, të lëshuar jo më vonë se 3 muaj nga data e aplikimit, është plotësuar pjesërisht. Shoqëria ka depozituar një ekstrakt të vitit 2018;

- neni 7, pika 1, germa “b” (veprimtaria e licencuar) është plotësuar;

- neni 7, pika 1, germa “c” (gjendja financiare e shoqërisë në kohën që paraqet kërkesën dhe efektin e pritshëm pas miratimit të transferimit të aseteve barrësuar) është plotësuar. Në kuadër të kësaj kërkesë shoqëria ka depozituar një përmbledhje të rezultateve ekonomike të shoqërisë nga fillimi i operimit të HEC-it;

- neni 7, pika 1, germa “d” (përshkrim i kandidatit të propozuar për transferim aset, që përfshin informacion të përgjithshëm mbi veprimtarinë e Shoqërisë që përfshihet në

transaksion të tri viteve të fundit dhe të vitit të fundit, kur shoqëria ka më pak se 3 vjet që është krijuar, gjendjen financiare) është plotësuar pjesërisht. Shoqëria ka paraqitur përshkrim të kandidatit të propozuar për transferim aset;

- neni 7, pika 1, germa “e” (arsyet e kërkesës për kryerjen e transferimit) është plotësuar;

- neni 7, pika 1, germa “f” (efektet e pritshme të transferimit në aktivitetin e të licencuarit) është plotësuar;

- neni 7, pika 1, germa “g” (efekti në furnizimin e rregullt e të qëndrueshëm të klientëve të të licencuarit dhe në tarifat e aktivitetit të licencuar) është plotësuar;

- neni 7, pika 1, germa “h” (marrëveshje paraprake e nënshkruar midis palëve në një nga format e parashikuara nga ligji, për transferimin e aseteve. Marrëveshja duhet të përmbajë një listë të detajuar të aseteve që kërkohet të transferohen), është plotësuar pjesërisht. Nga ana e shoqërisë është depozituar marrëveshja me “Alpha Bank” sh.a., por kjo marrëveshje nuk është e shoqëruar me listën e aseteve të cilat sipas kërkesës së Shoqërisë kalojnë për barrësim në bankë;

- neni 7, pika 1, germa “i” (deklaratë me shkrim e personit tek i cili është propozuar të bëhet transferimi, ku të shprehë gatishmërinë e tij për të garantuar vetë apo me palë të tjera veprimtarinë e licencuar pas kryerjes së transferimit) është plotësuar;

- neni 7, pika 1, germa “j” (nëse ka pasur, listën e transferimeve të kryera më herët nga i njëjti subjekt) është plotësuar. Shoqëria ka bërë me dije se ka nënshkruar më herët kontratë kredie me “Raiffeisen Bank” sh.a., që nga viti 2012 e, gjithashtu, ka listuar kontratat e kredisë të ndryshuara ndër vite (2012, 2014, 2014, 2015), të cilat janë të siguruara me marrëveshjet siguruese përkatëse në favor të “Raiffeisen Bank” sh.a.;

- neni 7, pika 3 (subjektet koncensionare të licencuara, të cilët aplikojnë për miratimin e transferimit të aseteve në ERE, duhet të shprehin në formë të shkruar në marrëveshjen e transferimit të aseteve, detyrimet me të cilat ngarkohen për shkak të marrëveshjes së koncensionit e pjesët që transferojnë te përfituesi). Kjo përfshin edhe informimin e Autoritetit Shtetëror, në lidhje me qëllimin e transferimit të aseteve, është plotësuar pjesërisht.



Në marrëveshjen e transferimit të nënshkruar midis palëve janë bërë me dije detyrimet me të cilat shoqëria ngarkohet për shkak të marrëveshjes së koncencionit, ku përcaktohet dhe detyrimi i shoqërisë për të marrë konfirmimin paraprak të MIE-s, por nga dokumentacioni konstatohet se Shoqëria Koncesionare nuk ka depozituar dokumentacion i cili të vërtetojë se ka përmbushur detyrimin për të marrë miratimin e Autoritetit Shtetëror (koncensiondhënësin METE, sot MIE), në lidhje me sa kërkuar;

- neni 7, pika 4 (kërkesa, informacioni dhe dokumentacioni i bashkëlidhur kërkesës, duhet të jenë të nënshkruar nga personi ose personat e autorizuar nga shoqëria që kanë kompetencën për përfaqësimin e personit mbajtës licence apo të kandidatit të propozuar) është plotësuar.

- Shoqëria “MTC Energy” sh.p.k., bën me dije se asetet e HEC “Radovë” do të vendosen peng tek “Alpha Bank” sh.a., me qëllim ristrukturimin e kredisë.

- Shoqëria në kërkesën e depozituar në ERE me nr. 679 prot., datë 5.5.2020, ka paraqitur një tabelë të vlerësimit imediat të aseteve HEC “Radovë”, e cila reflektohet me dy tregues të tyre.

- Në këtë listë shoqëria ka reflektuar asete, të tilla si: linjat elektrike, punime civile, materiale dhe pajisje të cilat janë instaluar në funksion të punës së hidrocentralit “Radovë”.

- Evidentohet se kjo tabelë e reflektuar nga shoqëria nuk është e vlerësuar nga auditues të jashtëm/pavarur apo nga vlerësues të pavarur. Gjithashtu, nuk disponohet një vlerësim nga banka e cila do të jetë huadhënësi për kredinë hipotekore që do t'i japë shoqërisë dhe ndërkohë do të jetë barrësuesi i këtyre aseteve sipas kushteve të kontratës së huas.

- Kontrolli i koncensiondhënësit (Autoriteti Shtetëror) prevalon mbi çdo interes të mbetur të konsiderueshëm duke kufizuar aftësinë praktike të operatorit (subjekti koncencionar) për të shitur ose dhënë peng infrastrukturën, e në kuptim të sa më sipër, Shoqëria Koncesionare duhet të marrë paraprakisht autorizim prej koncensiondhënësit për lënien peng të aseteve, si dhe të plotësojë mangësitë në dokumentacionin e paraqitur në zbatim të përcaktimeve të rregullores së procedurave të transferimit të

aseteve nga të licencuarit, miratuar me vendimin nr. 119, datë 21.7.2016, të Bordit të ERE-s, por dhe si kushte të marrëveshjes së huas, shtojca 1, pika 6.5.6, miratimi i MIE-s dhe pika 6.5.7, miratimi i Entit Rregullator të Energjisë (ERE).

- Për dokumentacionin e munguar, apo për atë që duhet të përditësohet, do të njoftohet subjekti që në bazë të nenit 11, pika 1, të “Rregullores për procedurat e transferimit të aseteve nga të licencuarit, ta paraqesë atë në Entin Rregullator të Energjisë (ERE), brenda afateve të përcaktuara.

Për gjithë sa më sipër cituar, Bordi i ERE-s

VENDOSI:

1. Fillimin e procedurës për shqyrtimin e kërkesës së shoqërisë “MTC Energy” sh.p.k., për transferimin e aseteve të saj nga “Raffaisen Bank” sh.a. tek “Alpha Bank” sh.a.

2. Drejtoria e Çështjeve Ligjore të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti



VENDIM
Nr. 108, datë 2.7.2020

**MBI NJË NDRYSHIM NË VENDIMIN E
BORDIT TË ERE-s NR. 187, DATË
10.11.2017, “PËR LICENCIMIN E
SHOQËRISË “ALBGAS” SHA, NË
AKTIVITETIN E SHPËRNDARJES SË
GAZIT NATYROR”, TË NDRYSHUAR,
DHE NJË NDRYSHIM NË VENDIMIN E
BORDIT TË ERE-s NR. 188, DATË
10.11.2017, “PËR LICENCIMIN E
SHOQËRISË “ALBGAS” SHA, NË
AKTIVITETIN E TRANSMETIMIT TË
GAZIT NATYROR”, TË NDRYSHUAR**

Në mbështetje të nenit 16, të ligjit nr. 43/2015 “Për sektorin e energjisë elektrike”, të ndryshuar; të nenit 16, pika 12; të neneve 46 dhe 56, të ligjit nr. 102/2015, “Për sektorin e gazit natyror”; të nenit 53, pika 3, të ligjit nr. 44/2015, “Kodi i Procedurave Administrative të Republikës së Shqipërisë”, si dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 2.7.2020, mbasi shqyrtoi relacionin e përgatitur nga Drejtoria e Licencimit, Autorizimeve dhe Mbikëqyrjes me nr. 78/1 prot., datë 23.6.2020, “Mbi një ndryshim në vendimet e Bordit të ERE-s nr. 187 dhe nr. 188, datë 10.11.2017”,

konstatoi se:

- Bordi i ERE-s, me vendimin nr. 220, datë 20.12.2019, vendosi:

1. Të miratojë ndryshimin e pikës 1, të vendimit nr. 187, datë 10.11.2017, si më poshtë:
- “Të licencojë shoqërinë “Albgaz” sh.a., në veprimtarinë e shpërndarjes së gazit natyror, për një afat 30-vjeçar, me kushtin që brenda datës 20.6.2020, në mbështetje të nenit 24, pika 2 e ligjit nr. 102/2015, “Për sektorin e gazit natyror”, të plotësojë të gjithë dokumentacionin e munguar...”

2. Të miratojë ndryshimin e pikës 1, të vendimit nr. 188, datë 10.11.2017, si më poshtë:

- “Të licencojë shoqërinë “Albgaz” sh.a., në veprimtarinë e transmetimit të gazit natyror, për një afat 30-vjeçar, me kushtin që brenda datës

20.6.2020, në mbështetje të nenit 24, pika 2, të ligjit nr. 102/2015, “Për sektorin e gazit natyror”, të plotësojë të gjithë dokumentacionin e munguar...”

- Në ERE ka mbërritur shkresa e shoqërisë “Albgaz” sh.a., nr. 121 prot., datë 16.6.2020, protokolluar në ERE me nr. 85 prot., datë 18.6.2020, “Kërkesë për shtyrje afati të vendimit mbi licencimin e shoqërisë ‘Albgaz’ sh.a.”, nëpërmjet së cilës shoqëria ka paraqitur kërkesën për shtyrje të afatit të dërgimit të dokumentacionit të munguar deri në datën 20.12.2020.

- Kjo kërkesë vjen në referim të vendimit të Këshillit të Ministrave nr. 243, datë 4.3.2020, për shpalljen e gjendjes së fatkeqësisë natyrore në të gjithë Republikën e Shqipërisë.

- Kërkesa e Shoqërisë për shtyrje të afatit të depozitimit të dokumentacionit të nevojshëm është depozituar përpara përfundimit të afatit të vendosur në vendimin e Bordit të ERE-s nr. 220, datë 20.12.2019 dhe duke marrë parasysh të gjitha kufizimet e vendosura gjatë kësaj periudhe me qëllim parandalimin e përhapjes së epidemisë së shkaktuar nga virusi COVID-19, vlerësojmë se shoqëria ndodhet në kushtet e pamundësisë për të siguruar dokumentacionin e nevojshëm.

Për gjithë sa më sipër cituar, Bordi i ERE-s

VENDOSI:

1. Të miratojë ndryshimin e pikës 1, të vendimit nr. 187, datë 10.11.2017, si më poshtë:

“Të licencojë shoqërinë “Albgaz” sh.a., në veprimtarinë e shpërndarjes së gazit natyror, për një afat 30-vjeçar, me kushtin që brenda datës 20.12.2020, në mbështetje të nenit 24, pika 2, e ligjit nr. 102/2015, “Për sektorin e gazit natyror”, të plotësojë të gjithë dokumentacionin e munguar.

2. Të miratojë ndryshimin e pikës 1, të vendimit nr. 188, datë 10.11.2017, si më poshtë:

“Të licencojë shoqërinë ‘Albgaz’ sh.a., në veprimtarinë e transmetimit të gazit natyror, për një afat 30-vjeçar, me kushtin që brenda datës 20.12.2020, në mbështetje të nenit 24, pika 2, e ligjit nr. 102/2015, “Për sektorin e gazit natyror”, të plotësojë të gjithë dokumentacionin e munguar.



3. Drejtoria e Çështjeve Ligjore të njoftojë shoqërinë “Albgaz” sh.a., për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim në ERE, brenda 7 ditëve kalendarike, si dhe mund të bëhet ankimi në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti

VENDIM
Nr. 109, datë 2.7.2020

**MBI DISA NDRYSHIME NË VENDIMIN
E BORDIT TË ERE-s NR. 221, DATË
20.12.2019, “MBI DISA NDRYSHIME NË
VENDIMIN E BORDIT TË ERE-s NR.
179, DATË 8.11.2017, ‘MBI CERTIFIKIMIN
E SHOQËRISË ‘OPERATORI I
KOMBINUAR I GAZIT NATYROR
‘ALBGAS’ SHA’”, TË NDRYSHUAR**

Në mbështetje të nenit 16, të ligjit nr. 43/2015 “Për sektorin e energjisë elektrike”, i ndryshuar; neneve 37, 50, 59, 68 dhe 80, të ligjit nr. 102/2015 “Për sektorin e gazit natyror”; nenit 53, pika 3, të ligjit nr. 44/2015 “Kodi i Procedurave Administrative të Republikës së Shqipërisë”; neneve 6–11, të “Rregullores për certifikimin e operatorit të sistemit të transmetimit të gazit natyror”, miratuar me vendimin e Bordit nr. 100, datë 5.8.2015, ndryshuar me vendimin e Bordit nr.129, datë 31.10.2015; si dhe nenit 15 të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 2.7.2020, mbasi shqyrtoi relacionin me nr.74/4 prot, datë 26.6.2020 të përgatitur nga Drejtoria e Licencimit, Autorizimeve dhe Mbikëqyrjes, mbi disa ndryshime në vendimin e Bordit të ERE-s nr. 221, datë 20.12.2020,

konstatoi se:

- Mbështetur në kushtet e parashikuara në vendimin e Bordit të ERE-s nr. 179, datë 8.11.2017, i ndryshuar, rezultoi se shoqëria “Albgaz” sh.a., nuk ka plotësuar ende kushtet si më poshtë:

- Shoqëria “Albgaz” sh.a. të dorëzojë për miratim në ERE programin e përputhshmërisë të përshtatur sipas atij të miratuar nga ERE me vendimin nr. 77, datë 26.5.2017, të Bordit të ERE-s, “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”.

- Bashkëpunimin ndërinstitucional për realizimin e ndryshimeve në kuadrin ligjor, nenet 11 dhe 46 (10) i ligjit për sektorin e gazit natyror dhe transferimi i kompetencave të Ministrisë së Ekonomisë. Për përmbushjen e këtij detyrimi, shoqëria “Albgaz” sh.a., do t’i paraqesë ERE-s provat dokumentare që ndryshimet ligjore dhe nënligjore të nevojshme që lidhen me transferimin e kompetencave të Ministrisë së Infrastrukturës dhe Energjisë (MIE) tek aksionari i “Albgaz” sh.a., Ministria e Ekonomisë dhe Financave kanë ndodhur janë efektive.

- Gjithashtu, në mënyrë periodike “Albgaz” sh.a., të paraqesë në ERE deklaratat e audituesve financiarë dhe pasqyrat financiare të shoqërisë çdo vit ushtrimor.

- Bordi i ERE-s, me vendimin nr. 221, datë 20.12.2019, ka vendosur:

1. Shfuqizimin e pikës 2, të vendimit të Bordit të ERE-s nr. 63, datë 23.4.2019.

2. Shtyrjen e afatit të parashikuar në pikën 3, të vendimit të Bordit të ERE-s nr. 63, datë 23.4.2019, deri më datë 20.6.2020.

3. Shtyrjen e afatit të parashikuar në pikën 4, vendimit të Bordit të ERE-s nr. 63, datë 23.4.2019, deri më 20.12.2020.

4. “Albgaz” sh.a. të paraqesë në ERE deklaratat e audituesve financiarë dhe pasqyrat financiare të shoqërisë çdo vit ushtrimor.

5. “Albgaz” sh.a. të marrë masa brenda datës 20.6.2020 lidhur me zbatimin e ndarjes së pronësisë në përputhje me parashikimet e nenit 36, pika 2, gjerat “a” dhe “b”, të ligjit nr. 102/2015 “Për sektorin e gazit natyror”.

6. Nëse ndarja e pronësisë së “Albgaz” sh.a., nuk është bërë sipas nenit 36, pika 2, gjerat “a” dhe “b”, të ligjit nr. 102/2015 “Për sektorin e gazit natyror”, i ndryshuar, brenda datës



20.6.2020, ERE ka të drejtë të rishikojë vendimin nr. 179, datë 8.11.2017, “Për certifikimin e shoqërisë ‘Operatori i kombinuar i gazit natyror ‘Albgaz’” sh.a.

- Kjo shtyrje u miratua për shkak të pamundësisë së “Albgaz” sh.a., për të përmbushur të gjitha kushtet brenda afatit të përcaktuar në vendimin nr. 179, datë 8.11.2017, “Mbi certifikimin e shoqërisë “Operatori i Kombinuar i Gazit Natyror ‘Albgaz’ sh.a.”.

- Brenda datës 20.6.2020, shoqëria duhet të depozitonte në Entin Rregullator të Energjisë (ERE) për miratim programin e përputhshmërisë, të përshtatur sipas atij të miratuar nga ERE me vendimin nr. 77, datë 26.5.2017, si dhe të raportonte për masat e marra për plotësimin e kushtit që lidhet me bashkëpunimin ndërinstitucional për realizimin e ndryshimeve në kuadrin ligjor.

- Me shkresën e protokolluar në ERE me nr. 745/1 prot., datë 10.6.2020, shoqëria ka argumentuar se pamundësia për plotësimin e kushteve në afat ka ardhur si pasojë e gjendjes së krijuar nga masat e marra nga qeveria shqiptare me qëllim mbrojtjen nga virusi COVID-19 dhe për rrethana që nuk varen nga vullneti i shoqërisë “Albgaz” sh.a.

- Me shkresën protokolluar në ERE me nr. 1961 prot., datë 30.1.2020, shoqëria ka depozituar pasqyrat financiare për vitin 2019, të cilat janë paraprahe dhe të paaudituar nga ekspertët kontabël, ndaj do t'i kërkohej t'i depozitojë në vijim, referuar edhe njoftimit të DPT-së, që ka shtyrë afatin e dorëzimit të tyre deri më datë 31 korrik 2020.

- Me shkresën e protokolluar në ERE me nr.786 prot., datë 18.6.2020, shoqëria ka depozituar deklaratat e audituesve financiarë, në përmbushje të kushtit të raportimit periodik, të parashikuar në vendimin nr. 179, datë 8.11.2017, “Mbi certifikimin e shoqërisë ‘Operatori i Kombinuar i Gazit Natyror ‘Albgaz’ sh.a.”, si dhe ka paraqitur kërkesën për shtyrje të afatit të plotësimit të kushteve të mbetura pa plotësuar deri më datën 20.12.2020.

- Kërkesa e shoqërisë për zgjatje të afatit të plotësimit të kushteve të parashikuara në vendimin e Bordit të ERE-s nr. 179, datë 8.11.2017, “Mbi certifikimin e shoqërisë ‘Operatori i Kombinuar i Gazit Natyror ‘Albgaz’

sh.a.”, është depozituar në ERE brenda afatit të përcaktuar në vendimin e Bordit të ERE-s nr. 221, datë 20.12.2019.

- Plotësimi i kushteve brenda afatit të përcaktuar në vendimin e ERE-s, është pamundësuar nga rrethana që nuk varen nga vullneti i shoqërisë.

Për gjithë sa më sipër cituar, Bordi i ERE-s

VENDOSI:

1. Pika 2, e vendimit nr. 221, datë 20.12.2019, ndryshon si më poshtë:

- Shoqëria “Albgaz” sh.a. të dorëzojë për miratim në ERE deri më datën 20.12.2020, programin e përputhshmërisë të përshtatur sipas atij të miratuar nga ERE me vendimin nr. 77, datë 26.5.2017, të Bordit të ERE-s, “Mbi miratimin e programit të përputhshmërisë së Operatorit të Sistemit të Transmetimit për Gazin Natyror”.

2. Pikat 5 dhe 6 bëhen pika 5 me këtë përmbajtje:

- Shoqëria “Albgaz” sh.a., të marrë masa për të plotësuar kushtin e vendosur në pikën 5.2, të vendimit nr. 179, datë 8.11.2017, brenda datës 20.12.2020.

3. Shoqëria “Albgaz” sh.a. të depozitojë në ERE pasqyrat financiare të audituara për vitin ushtrimor 2019 sipas afateve të përcaktuara në njoftimin e Drejtorisë së Përgjithshme të Tatimeve.

4. Drejtoria e Çështjeve Ligjore të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrît Ahmeti



VENDIM

Nr. 110, datë 2.7.2020

**MBI KËRKESËN E SHOQËRISË
“SOLARIS POWER” SHPK, PËR
RISHIKIMIN E VENDIMIT TË BORDIT
TË ERE-s NR. 86, DATË 12.5.2020, “MBI
REFUZIMIN E KËRKESËS SË
SHOQËRISË ‘SOLARIS POWER’ SHPK,
PËR LICENCIM NË VEPRIMTARINË E
TREGTIMIT TË ENERGJISË
ELEKTRIKE”**

Në mbështetje të neneve 16, pika 5, të ligjit nr. 43/2015 “Për sektorin e energjisë elektrike”, i ndryshuar; nenit 52, pika 3 dhe nenit 92, pikat 1 dhe 2, të “Kodit të Procedurave Administrative të Republikës së Shqipërisë”; nenit 16, pika 2, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Regullator të Energjisë (ERE), në mbledhjen e tij të datës 2.7.2020, mbasi shqyrtoi relacionin me nr. 78/2 prot., datë 26.6.2020, të përgatitur nga Drejtoria e Licencimit, Autorizimeve dhe Mbikëqyrjes, “Mbi kërkesën e shoqërisë ‘Solaris Power’” sh.p.k., për rishikimin e vendimit të Bordit të ERE-s nr. 86, datë 12.5.2020,

konstatoi se:

- Bordi i ERE-s, me vendimin nr. 48, datë 24.3.2020, vendosi: fillimin e procedurës për licencimin e shoqërisë “Solaris Power” sh.p.k., në veprimtarinë e tregtimit të energjisë elektrike.

- Pas marrjes së këtij vendimi, të ndodhur dhe në kushtet e pandemisë së shkaktuar nga përhapja e virusit COVID-19, si dhe shpalljes së gjendjes së fatkeqësisë natyrore në Republikën e Shqipërisë, në datën 31.3.2020, Shoqërisë i është dërguar me *email* (në adresën që rezultonte nga ekstrakti historik i QKB-së i depozituar në ERE së bashku me dosjen e aplikimit) shkresa për njoftimin e vendimarrjes së Bordit të ERE-s sipërcituar, si dhe kërkesa për depozitimin e dokumentacionit të munguar apo informacionit shtesë.

- Shoqëria nuk ka kthyer përgjigje dhe nuk e ka plotësuar dokumentacionin e konstatuar të munguar brenda afatit të përcaktuar për vendimarrje.

- Bordi i ERE-s, me vendimin nr. 86, datë 12.5.2020, vendosi: të refuzojë kërkesën e shoqërisë

“Solaris Power” sh.p.k., për licencim në veprimtarinë e tregtimit të energjisë elektrike.

- Për këtë vendimarrje shoqëria “Solaris Power” sh.p.k. është njoftuar me shkresën e ERE-s nr. 447/1 prot., datë 14.5.2020 (dërguar nëpërmjet postës, në adresën e shoqërisë që rezulton në ekstraktin e Qendrës Kombëtare të Biznesit (QKB)).

- ERE ka proceduar në vijim me ridërgimin e shkresës sipërcituar në adresën sekondare të lënë në formatin e aplikimit nga përfaqësuesi ligjor i kësaj shoqërie.

- Me shkresën e protokolluar në ERE me nr. 447/2 prot., datë 28.5.2020, shoqëria “Solaris Power” sh.p.k., ka paraqitur kërkesën për rishikimin e vendimit të bordit të ERE-s nr. 86, datë 12.5.2020, me pretendimin se nuk e ka marrë njoftimin për fillimin e procedurës, për shkak se *email*-i i vendosur në ekstraktin historik të shoqërisë, i përket një punonjësi të larguar nga shoqëria.

- Bashkëlidhur kërkesës për rishikimin e vendimit nr. 86, datë 12.5.2020, shoqëria “Solaris Power” sh.p.k., ka depozituar dhe një pjesë të dokumentacionit të konstatuar të munguar.

- ERE vlerëson se kërkesa e shoqërisë “Solaris Power” sh.p.k., përmbush kushtet dhe përcaktimet ligjore, që kanë të bëjnë me legjitimitetin e palëve dhe afatin për të paraqitur një kërkesë të tillë.

- Gjatë shqyrtimit të kërkesës së shoqërisë është konstatuar se nuk është plotësuar ende tërësisht dokumentacioni i kërkuar për t’u pajisur me licencë në veprimtarinë e tregtimit të energjisë elektrike, ndaj ERE-s i është drejtuar shoqërisë me shkresën nr. 447/3 prot., datë 11.6.2002, duke i kërkuar që të depozitojë dokumentacionin e munguar.

- Me shkresën nr. 447/4 prot., datë 19.6.2020, shoqëria “Solaris Power” sh.p.k., ka kërkuar zgjatjen e afatit me 10 ditë të tjera për depozitimin e këtij dokumentacioni.

Për gjithë sa më sipër cituar, Bordi i ERE-s

VENDOSI:

1. Të zgjasë me 30 (tridhjetë) ditë afatin e shqyrtimit të kërkesës së shoqërisë “Solaris Power” sh.p.k., për rishikimin e vendimit të Bordit të ERE-s nr. 86, datë 12.5.2020, “Mbi refuzimin e kërkesës së shoqërisë ‘Solaris Power’ sh.p.k., për licencim në veprimtarinë e tregtimit të energjisë elektrike”.



2. Drejtoria e Çështjeve Ligjore të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti

VENDIM
Nr. 111, datë 2.7.2020

**MBI PLOTËSIMIN E KUSHTIT TË
VENDIMIT NR. 80, DATË 4.5.2020, “MBI
RINOVIMIN E LICENCËS SË
SHOQËRISË ‘ALPIQ ENERGY
ALBANIA’ SHPK NR. 291, SERIA FK15,
NË VEPRIMTARINË E FURNIZIMIT TË
ENERGJISË ELEKTRIKE, TË
MIRATUAR ME VENDIMIN E BORDIT
TË KOMISIONERËVE TË ERE-s NR. 73,
DATË 13.5.2015” DHE VENDIMIT NR. 81,
DATË 4.5.2020, “MBI RINOVIMIN E
LICENCËS SË SHOQËRISË ‘ALPIQ
ENERGY ALBANIA’ SHPK NR. 290,
SERIA T15, NË VEPRIMTARINË E
TREGTIMIT TË ENERGJISË
ELEKTRIKE, TË MIRATUAR ME
VENDIMIN E BORDIT TË
KOMISIONERËVE TË ERE-s NR. 72,
DATË 13.5.2015”**

Në mbështetje të neneve 16, 37, pika 2, germat “ç” dhe “d”, të ligjit nr. 43/2015 “Për sektorin e energjisë elektrike”, i ndryshuar; nenit 113, të “Kodit të Procedurës Administrative të Republikës së Shqipërisë”; nenit 4, pika 1, germat “d” dhe “e”, nenit 5, pika 1, germat “d” dhe “e”, dhe nenit 13, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, miratuar me vendimin e Bordit të ERE-s nr. 109, datë 29.6.2016, e ndryshuar, nenit 15 të “Rregullores për organizimin, funksionimin dhe procedurat e

ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 2.7.2020, mbasi shqyrtoi relacionin me nr. 78/3 prot., datë 25.6.2020, të përgatitur nga Drejtoria e Licencimit, Autorizimeve dhe Mbikëqyrjes, mbi kërkesën e Shoqërisë “Alpiq Energy Albania” sh.p.k., mbi plotësimin e kushtit të vendimit të Bordit të ERE-s nr. 80 dhe nr. 81, datë 4.5.2020, konstatoi se:

- Bordi i ERE-s me vendimin nr. 80, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k., nr. 291, seria FK15, në veprimtarinë e furnizimit të energjisë elektrike, të miratuar me vendimin e Bordit të Komisionerëve të ERE-s nr. 73, datë 13.5.2015”, vendosi:

- Të rinovojë licencën nr. 291, seria F15, të shoqërisë “Alpiq Energy Albania” sh.p.k., në veprimtarinë e furnizimit të energjisë elektrike, të miratuar me vendimin e Bordit të ERE-s nr.73, datë 13.5.2015, për një afat 5-vjeçar, duke filluar vlefshmërinë nga data 14.5.2020.

- Shoqëria të plotësojë tërësisht kërkesat e nenit 9, pika 2, germa “d”, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, brenda një muaji nga përfundimi i gjendjes së fatkeqësisë natyrore në të gjithë Republikën e Shqipërisë për shkak të epidemisë së shkaktuar nga COVID-19.

- Po ashtu, Bordi i ERE-s, me vendimin nr. 81, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k., nr. 290, seria T15, në veprimtarinë e tregtimit të energjisë elektrike, të miratuar me vendimin e Bordit të Komisionerëve të ERE-s nr. 72, datë 13.5.2015”, vendosi:

- Të rinovojë licencën nr. 290, seria T15, të shoqërisë “Alpiq Energy Albania” sh.p.k., në veprimtarinë e tregtimit të energjisë elektrike, të miratuar me vendimin e Bordit të ERE-s, nr. 72, datë 13.5.2015, për një afat 5-vjeçar, duke filluar nga data 14.5.2020.

- Shoqëria të plotësojë kërkesën e nenit 9, pika 2, germa “d”, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, brenda një muaji nga



përfundimi i gjendjes së fatkeqësisë natyrore, të shpallur me vendimin e Këshillit të Ministrave.

- Në vijim të këtyre vendimmarrjeve me shkresën nr. 552/7 prot., datë 13.5.2020, u krye njoftimi i vendimit të rinovimit, pranë shoqërisë “Alpiq Energy Albania” sh.p.k., duke i bërë me dije dokumentacionin e munguar, që konsiston në:

- Vërtetimet e lëshuara nga Gjykata për përfshirje ose jo në një proces penal të drejtuesve të shoqërisë, neni 9, pika 2, germa “d”.

- Shoqëria “Alpiq Energy Albania” sh.p.k., me shkresën e protokolluar në ERE me nr. 552/8 prot., datë 17.6.2020, ka paraqitur në ERE të gjithë dokumentacionin e konstatuar të munguar.

- Me plotësimin e këtij dokumentacioni, pika 2 e vendimeve të Bordit të ERE-s nr. 80, datë 4.5.2020 dhe nr. 81, datë 4.5.2020 rezulton e plotësuar.

Për gjithë sa më sipër cituar, Bordi i ERE-s

VENDOSI:

1. Pika 2 e vendimit nr. 80, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k. nr. 291, seria FK15, në veprimtarinë e furnizimit të energjisë elektrike, të miratuar me vendimin e bordit të komisionerëve të ERE-s, nr. 73, datë 13.5.2015”, shfuqizohet.

2. Pika 2 e vendimit nr. 81, datë 4.5.2020, “Mbi rinovimin e licencës së shoqërisë ‘Alpiq Energy Albania’ sh.p.k., nr. 290, seria T15, në veprimtarinë e tregtimit të energjisë elektrike, të miratuar me vendimin e Bordit të Komisionerëve të ERE-s nr. 72, datë 13.5.2015”, shfuqizohet.

3. Drejtoria e Çështjeve Ligjore të njoftojë shoqërinë “Alpiq Energy Albania” sh.p.k., për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti

KËRKESË

Nr. 2497/4, datë 21.7.2020

PËR SHPRONËSIM PUBLIK

Ministria e Infrastrukturës dhe Energjisë shpall kërkesën për shpronësim, për interes publik të pasurive të paluajtshme, pronë private, që preken nga ndërtimi i objektit “Rrjeti shpërndarës 20 kV, nënstationi Pogradec fideri 1, 9, 10, rikonstrukcion kabina, kabina të reja dhe linjë TU me përcjellës me vetëmbajtje ABC”.

Subjekti kërkues i këtij projekti është Operatori i Sistemit të Shpërndarjes së Energjisë Elektrike.

Me anë të këtij publikimi, kërkojmë të vëmë në dijeni personin e prekur nga ky shpronësim, për pasuritë e paluajtshme, pronë private, të cilat do të kompensohen sipas vlerësimit paraprak të llogaritur, bazuar në VKM-në nr. 89, datë 3.2.2016, “Për miratimin e hartës së vlerës së tokës në Republikën e Shqipërisë”, sipas tabelës paraprake bashkëlidhur.

Personat që preken nga ky projekt të cilët kanë emrin në tabelën e publikuar dhe personat të cilët preken por nuk figurojnë në këto lista, jo më vonë se 15 (pesëmbëdhjetë) ditë nga publikimi në Fletoren Zyrtare, kanë të drejtë të paraqesin pretendimet e tyre, të shoqëruara me dokumentacionin përkatës, si edhe të shprehen nëse janë dakord me të dhënat e publikuara për përfundimin e procedurave të shpronësimit, në Operatorin e Sistemit të Shpërndarjes së Energjisë Elektrike, si dhe në Ministrinë e Infrastrukturës dhe Energjisë.

Vlera totale paraprake e shpronësimit është 4 999.68 (katër mijë e nëntëqind e nëntëdhjetë e nëntë pikë gjashtëdhjetë e tetë) lekë.

ZËVENDESMINISTËR I
INFRASTRUKTURËS
DHE ENERGJISË
Artan Shkreli



LISTA EMËRORE PARAPRAKE E PRONARËVE TË PASURIVE TË PALUAJTSHME, PRONË PRIVATE, QË PREKEN NGA NDËRTIMI I OBJEKTIT “RRJETI SHPËRNDARËS 20 kV, NËNSTACIONI POGRADEDEC FIDERI 1, 9, 10, RIKONSTRUKSION KABINA, KABINA TË REJA DHE LINJË TU ME PËRCJELLËS ME VETËMBAJTJE ABC”

Nr.	Numri i kabinës	Emër	Atësia	Mbiemër	Lloji i pasurisë	Zona kadastrale	Nr. i pasurisë	Sip. totale (m ²)	Sip. e prekur (m ²)	Çmimi truall lekë/m ²	Vlera në lekë	Shënime në kartelë
1	2	3	4	5	6	7	8	9	10	11	14	15
POGRADEDEC, VENDORE ZONA KADASTRALE 3745												
1	1/8 Kalceto	Luan Selviko Edison	Feti Selman Luan	Musollari Musollari Musollari	arë	3745	29/1/31	2000	26.04	192	4999.68	Konfirmuar nga ASHK-ja Drejtoria Vendore Pogradec Bashkëpronësi
VLERA PARAPRAKE E SHPRONËSIMIT											4999.68	

Për tokën “arë”, çmimi i llogaritur është marrë nga VKM-ja nr. 89, datë 3.2.2016.

**NJOFTIM****Nr. 8477, datë 23.7.2020****MBI HYRJEN NË FUQI TË NJË
MARRËVESHJEJE NDËRKOMBËTARE**

“Marrëveshja ndryshuese me shkëmbim notash të Marrëveshjes ndërmjet Këshillit të Ministrave të Republikës së Shqipërisë dhe Qeverisë së Republikës së Italisë, për realizimin e programit të ristrukturimit teknik dhe menaxherial të KESH-it dhe fuqizimin e sistemit elektrik shqiptar”, ka hyrë në fuqi më 17 prill 2020.

SEKRETARI I PËRGJITHSHËM**Armand Skapi**

Në mungesë dhe me autorizim

Shpresa Shahaj**KËRKESE**

Shtetasi Ferdinand Dinaku kërkon pranë Gjykatës së Rrethit Gjyqësor Elbasan, shpalljen të vdekur të djalit të tij shtetasit Edmond Dinaku, i datëlindjes 29.7.1964.

KËRKUES**Ferdinant Dinaku**

*Shënim: Ky dokument është gjeneruar dhe vulosur me anë
të një procedure automatike nga një sistem elektronik
(Qendra e Botimeve Zyrtare)*

	Formati 61x86/8
--	-----------------

Shtypshkronja e Qendrës së Botimeve Zyrtare
Tiranë, 2020

Adresa: Rr. "Nikolla Jorga", Tiranë
Tel./fax: +355 4 24 27 004 Tel.: +355 4 24 27 006

Çmimi 280 lekë